



280-70



綴じ部(喉部分)の文字など開きが不鮮明な箇所あり

隋書目錄

特進臣魏徵上

皇明朝列大夫國子監祭酒臣方從哲
承直郎國子監司業臣楊道賓等奉
勅重較刊
皇明朝列大夫國子監祭酒臣吳士元
承德郎司業仍加俸一級臣黃錦等奉
旨重修

帝紀五

志三十

列傳五十

共八十五卷

隋書卷一

刊

隋書目錄

580-10

帝紀第一

高祖上

隋書卷二

帝紀第二

高祖下

隋書卷三

帝紀第三

煬帝上

隋書卷四

帝紀第四

煬帝下

隋書卷五

帝紀第五

恭帝

志

隋書卷六

志第一

禮儀一

隋書卷七

志第二

禮儀二

隋書卷八

志第三

禮儀三

隋書卷九

志第四

禮儀四

隋書卷十

志第五

禮儀五

隋書卷十一

志第六

禮儀六

隋書卷十二

志第七

禮儀七

隋書卷十三

志第八

音樂上

隋書卷十四

萬曆二十六年

隋書目錄

三

志第九

音樂中

隋書卷十五

志第十

音樂下

隋書卷十六

志第十一

律曆上

隋書卷十七

志第十二

律曆中

隋書卷十八

志第十三

律曆下

隋書卷十九

志第十四

天文上

隋書卷二十

志第十五

天文中

隋書卷二十一

天文下

日

隋書卷二十一

志第十六

天文下

隋書卷二十二

志第十七

五行上

隋書卷二十三

志第十八

五行下

隋書卷二十四

志第十九

食貨

隋書卷二十五

志第二十

刑法

隋書卷二十六

志第二十一

百官上

隋書卷二十七

志第二十二

百官中

隋書卷二十八

志第二十三

百官下

隋書卷二十九

志第二十四

地理上

隋書卷三十

志第二十五

地理中

隋書卷三十一

志第二十六

地理下

隋書卷三十二

志第二十七

經籍一經

隋書卷三十三

志第二十八

經籍二史

隋書卷三十四

志第二十九

經籍三子

隋書卷三十五

志第三十

經籍四集 道經 佛經

隋書卷三十六

列傳第一

列傳第一后妃

文獻獨孤皇后

容華夫人蔡氏

宣華夫人陳氏

煬帝蕭皇后

隋書卷三十七

列傳第二

李穆子暉 穆兄子詢 梁睿崇子敏

隋書卷三十八

列傳第三

劉昉 鄭譯

柳裘 皇甫績字士奇

盧賁

隋書卷三十九

列傳第四

于義 子宣道 宣敏

陰壽 子世師 骨儀附

竇榮定

元景山

源雄

豆盧勣 子毓 勣兄通

賀若誼

隋書卷四十

列傳第五

梁士彥 子剛

宇文忻

王誼

元諧

王世積

虞慶則

元曹

隋書卷四十一

列傳第六

高穎

蘇威 子夔

隋書卷四十二

列傳第七

李德林

隋書卷四十三

列傳第八

河間王弘 子慶

楊處綱

楊子崇

觀德王雄 弟達

隋書卷四十四

列傳第九

滕穆王瓚

嗣王綸

道悼王靜

衛昭王爽

嗣子集

蔡王智積

隋書卷四十五

列傳第十文四子

房陵王勇

子儼

秦孝王俊

子暉

庶人秀

庶人諒

隋書卷四十六

列傳第十

趙嘏

趙芬

楊尚希

長孫平

元暉

韋師

楊昇

蘇孝慈

兄子沙羅

李雄

張嬰

隋書卷四十七

列傳第十二

韋世康

弟洸 藝 從父弟壽

沖

柳機

子述 從兄雄

機弟日

亮 從子 肅

譽之 族兄昂

隋書卷四十八

隋書目錄
列傳第十三

楊素 弟約
文紀

從父文思

隋書卷四十九

列傳第十四

牛弘

隋書卷五十

列傳第十五

宇文慶

李禮成

元孝矩 弟襄

郭榮

龐晃

李安

隋書卷五十一

列傳第十六

長孫覽 從子藏
藏弟晟

隋書卷五十二

列傳第十七

韓擒虎 弟僧壽
洪 賀若弼

隋書卷五十三

列傳第十八

達奚長儒 賀婁子幹

史萬歲 劉方

隋書目錄
隋書卷五十四

隋書目錄

十

隋書卷五十四

列傳第十九

王長述

李衍

伊婁謙

田仁恭

元亨

杜整

李徽

灌彭

隋書卷五十五

列傳第二十

杜彥

高勵

朱敞

周搖

獨孤諧

乞伏慧

張威

和洪

侯莫陳頴

隋書卷五十六

列傳第二十一

盧愷

令狐熙

薛胄

宇文弼

張衡

楊汪

隋書卷五十七

列傳第二十二

隋書目錄
盧師道

從父兄昌衡

李元操

薛道衡

從弟孺

隋書卷五十八

列傳第二十三

明克讓

魏澹

陸爽

侯白

杜臺卿

辛德源

柳晉

許善心

李文博

隋書卷五十九

列傳第二十四煬三子

元德太子昭

齊王暕

趙王杲

隋書卷六十

列傳第二十五

崔仲方

于仲文

兄顓
從父弟璽

段文振

隋書卷六十一

列傳第二十六

宇文述

郭衍

隋書卷六十二

萬曆二十六年刊

隋書目錄

七

列傳第二十七

王韶

元巖

劉行本

梁毗

柳彧

趙綽

裴肅

隋書卷六十三

列傳第二十八

樊子蓋

史祥

元壽

楊義臣

衛玄

劉權

隋書卷六十四

列傳第二十九

李圓通

陳茂

張定和

張大淵

麥鐵杖

沈光

來護兒

魚俱羅

陳稜

王辯 斛斯萬善

隋書卷六十五

列傳第三十

周羅喉

周灋尚

萬曆二十六年刊

隋書目錄

十三

李景

慕容三藏

薛世雄

王仁恭

權武

吐萬緒

董純

趙才

隋書卷六十六

列傳第三十一

李諤

鮑宏

裴政

柳莊

源師

郎茂

高構

張虔威

榮毗

陸知命

房彥謙

隋書卷六十七

列傳第三十二

虞世基

裴蘊

裴矩

隋書卷六十八

列傳第三十三

宇文愷

閻毗

何稠

隋書卷六十九

列傳第三十四

王劭

袁充

隋書卷七十

列傳第三十五

楊玄感

李子雄 斛斯欽

趙元淑 劉元振

李密

裴仁基

隋書卷七十一

列傳第三十六誠節

劉弘

皇甫誕

敬釗

游元

馮慈明

張須陀

楊善會

獨孤盛

元文都

盧楚

劉子翊

堯君素

陳孝意 松贊

張

瑜

隋書卷七十二

列傳第三十七孝義

陸彥師

田德懋

薛睿

王頒

楊慶

郭雋

田翼

紐回

劉仕雋

郎方貴

翟普林

李德饒

華秋

徐孝肅

隋書卷七十三

列傳第三十八循吏

梁彥光

樊叔略

趙軌

房恭懿

公孫景茂

辛公義

柳儉

郭絢
敬甫

劉曠

王伽

魏德

隋書卷七十四

列傳第三十九酷吏

庫狄士文

田式

燕榮

趙仲卿

崔弘度

弟弘昇

元弘嗣

王文同

隋書卷七十五

列傳第四十儒林

元善

辛彥之

何妥 蕭該 包愷

房暉遠

馬光

劉焯

劉炫 褚 張冲

顧虎 王孝籍 魯世達

隋書卷七十六

列傳第四十一文學

劉臻

王頰

崔儵

諸葛穎

孫萬壽

王貞

虞綽

王贊

庾自直

潘徽

杜正玄 弟正藏

隋書卷七十七

列傳第四十二隱逸

李士謙

崔廓

徐則

張文詡

隋書卷七十八

列傳第四十三藝術

庾季才 子質

盧太翼

耿詢

韋鼎

來和

蕭吉

楊伯醜

臨孝恭

劉祐

張胃玄

許智藏

萬寶常

隋書卷七十九

列傳第四十四外戚

獨孤羅弟化

蕭歸子琮 琮弟志

隋書卷八十

列傳第四十五列女

蘭陵公主

南陽公主

襄城王妃

華陽王妃

譙國夫人

鄭善果母

孝女王舜

韓觀妻

陸襄母

劉昶女

鍾士雄母

孝婦覃氏

元務光母

裴倫妻

趙元楷妻

隋書卷八十一

列傳第四十六東夷

高麗

百濟

新羅

靺鞨

流求

倭國

隋書卷八十二

列傳第四十七南蠻

林邑

赤土

真臘

婆利

隋書卷八十三

列傳第四十八西域

吐谷渾

党項

高昌

康國

安國

石國

女國

焉耆

龜茲

疎勒

于闐

鋌汗

吐火羅

挹怛國

米國

史國

曹國

何國

烏那曷

穆國

波斯

漕國

附國

隋書卷八十四

萬曆二十六年刊

隋書目錄

七

列傳第四十九北狄

突厥

西突厥

鐵勒

奚

契丹

靺鞨

室韋

隋書卷八十五

列傳第五十

字文化及

弟智及
裴虔通

司馬德戡

王充

段達

隋書目錄終

隋書卷一

帝紀第一

特進臣魏徵上

皇明朝列大夫國子監祭酒臣方從哲

承直郎國子監司業臣楊道賓等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

高祖上

高祖文皇帝姓楊氏諱堅弘農郡華陰人也漢太尉震八代孫鉉仕燕為北平太守鉉生元壽後魏代為武川鎮司馬子孫因家焉元壽生太原太守惠嘏嘏生平原太守烈烈生寧遠將軍禎禎生忠忠即皇考也皇考從

周太祖起義關西賜姓普六茹氏位至柱國大司空隋國公薨贈太保諡曰桓皇妣呂氏以大統七年六月癸丑夜生高祖於馮翊般若寺紫氣充庭有尼來自河東謂皇妣曰此兒所從來甚異不可於俗間處之尼將高祖舍於別館躬自撫養皇妣嘗抱高祖忽見頭上角出徧體鱗起皇妣大駭墜高祖於地尼自外入見曰已驚我兒致令晚得天下爲人龍顏額上有五柱入頂目光外射有文在手曰王長上短下沈深嚴重初入太學雖至親昵不敢狎也年十四京兆尹薛善辟爲功曹十五以太祖勳授散騎常侍車騎大將軍儀同三司封成紀縣公十六遷驃騎大將軍加開府周太祖見而歎曰此兒風骨不似代間人明帝卽位授右小宮伯進封大興郡公帝嘗遣善相者趙昭視之昭詭對曰不過作柱國耳旣而陰謂高祖曰公當爲天下君必大誅殺而後定善記鄙言武帝卽位遷左小宮伯出爲隋州刺史進位大將軍後徵還遇皇妣寢疾三年晝夜不離左右代稱純孝宇文護執政尤忌高祖屢將害焉大將軍侯伏侯壽等匡護得免其後襲爵隋國公武帝聘高祖長女爲皇太子妃益加禮重齊王憲言於帝曰普六茹堅相貌非常臣每見之不覺自失恐非人下請早除之帝曰此

止可爲將耳內史王軌驟言於帝曰皇太子非社稷主
普六茹堅貌有反相帝不悅曰必天命有在將若之何
高祖甚懼深自晦匿建德中率水軍三萬破齊師於河
橋明年從帝平齊進位柱國宇文憲破齊任城王高潛
於冀州除定州總管先是定州城西門久閉不行齊文
宣帝時或請開之以便行路帝不許曰當有聖人來啓
之及高祖至而開焉莫不驚異尋轉亳州總管宣帝卽
位以后父徵拜上柱國大司馬大象初遷大後丞右司
武俄轉大前疑每巡幸恒委居守時帝爲刑經聖制其
法深刻高祖以法令滋章非興化之道切諫不納高祖

位望益隆帝頗以爲忌帝有四幸姬並爲皇后諸家爭
寵數相毀譖帝每忿怒謂后曰必族滅爾家因召高祖
命左右曰若色動卽殺之高祖旣至容色自若乃止大
象二年五月以高祖爲揚州總管將發暴有足疾不果
行乙未帝崩時薛帝幼冲未能親理政事內史上大夫
鄭譯御正大夫劉昉以高祖皇后之父衆望所歸遂矯
詔引高祖入總朝政都督內外諸軍事周氏諸王在藩
者高祖悉恐其生變稱趙王招將嫁女於突厥爲詞以
徵之丁未發喪庚戌周帝拜高祖假黃鉞左大丞相百
官總已而聽焉以正陽宮爲丞相府以鄭譯爲長史劉

訪爲司馬具置寮佐宣帝時刑政苛酷羣心崩駭莫有
固志至是高祖大崇惠政法令清簡躬履節儉天下悅
之六月趙王招陳王純越王達代王盛滕王道並至于
長安相州總管尉遲迥自以重臣宿將志不能平遂舉
兵東夏趙魏之士從者若流旬日之間衆至十餘萬又
宇文胄以滎州石慈以建州席毗以沛郡毗弟义羅以
兗州皆應於迥迥遣子質於陳請援高祖命上柱國鄭
國公韋孝寬討之雍州牧畢王賢及趙陳等五王以天
下之望歸於高祖因謀作亂高祖執賢斬之寢趙王等
之罪因詔五王劔履上殿入朝不趨用安其心七月陳將
陳紀蕭摩訶等寇廣陵吳州總管于顛轉擊破之廣陵
人杜喬生聚衆反刺史元義討平之韋孝寬破尉遲迥
於相州傳首闕下餘黨悉平初迥之亂也鄭州總管司
馬消難據州響應淮南州縣多同之命襄州總管王誼
討之消難奔陳荆郢羣蠻乘釁作亂命亳州總管賀若
誼討平之先是上柱國王謙爲益州總管旣見幼主在
位政由高祖遂起巴蜀之衆以匡復爲辭高祖方以東
夏山南爲事未遑致討謙進兵屯劔閣陷始州至是乃
命行軍元帥上柱國梁睿討平之傳首闕下巴蜀阻險
人好爲亂於是更開平道毀劔閣之路立銘垂誠焉五

王陰謀滋甚高祖齎酒肴以造趙王第欲觀所爲趙王
伏甲以宴高祖高祖幾危賴元胄以濟語在胄傳於是
誅趙王招越王盛九月以世子勇爲洛州總管東京小
冢宰壬子周帝詔曰假黃鉞使持節左大丞相都督內
外諸軍事上柱國大冢宰隋國公堅感山河之靈應星
辰之氣道高雅俗德協幽顯釋巾登仕搢紳傾屬開物
成務朝野承風受詔先皇彌諸寡薄合天地而生萬物
順陰陽而撫四夷近者內有艱虞外聞妖寇以鷹鷂之
志運帷帳之謀行兩觀之誅掃萬里之外遐邇清肅實
所賴焉四海之廣百官之富俱稟大訓咸餐至道治定
功成棟梁斯託神猷盛德莫二於時可授大丞相罷左
右丞相之官餘如故冬十月壬申詔贈高祖曾祖烈爲
柱國太保都督徐兗等十州諸軍事徐州刺史隋國公
諡曰康祖禎爲柱國太傅都督陝蒲等十三州諸軍事
同州刺史隋國公諡曰獻考忠爲上柱國太師大冢宰
都督冀定等十三州諸軍事雍州牧誅陳王純癸酉上
柱國鄭國公韋孝寬卒十一月辛未誅代王達滕王道
十二月甲子周帝詔曰天大地大合其德者聖人一陰
一陽調其氣者上宰所以降神載挺陶鑄羣生代蒼蒼
之工成巍巍之業假黃鉞使持節大丞相都督內外諸

軍事上柱國大冢宰隋國公應百代之期當千齡之運
家隆台鼎之盛門有翊贊之勤心同伊尹必致堯舜情
類孔丘憲章文武爰初入仕風流映世公卿仰其軌物
播紳謂爲師表入處禁闈出居藩政芳猷茂績問望彌
遠往平東夏人情未安燕南趙北實爲天府擁節杖旄
任當連率柔之以德導之以禮畏之若神仰之若日芳
風美迹歌頌獨存淮海榛蕪多歷年代作鎮南鄙選衆
惟賢威震殊俗化_○黔首任掌鈞陳職司邦政國之大
事朝寄更深鑿駕巡遊留臺務廣周公陝西之任僅可
爲倫漢臣關內之重未足相况及天崩地坼先帝升遐
朕以眇年奄經荼毒親受顧命保乂皇家姦人乘隙潛
圖宗社無君之意已成竊發之期有日英規潛運大略
川迴匡國庇人罪人斯得兩河遘亂三魏稱兵半天之
下洵洵鼎沸祖宗之基已慮生人之命將怠安陸作釁
南通吳越蜂飛蠱聚江漢騷然巴蜀鷓張讎將問鼎秦
塗更阻漢門重閉畫籌帷帳建出師車諸將稟其謀壯
士感其義不違時日咸得清蕩九功遠被七德允諸百
僚師師四門穆穆光景照臨之地風雲去來之所允武
允文幽明同德驟山驟水遐邇歸心使朕繼踵上皇無
爲以治聲高宇宙道格天壤伊尹韞殷霍光佐漢方之

茂如也昔營丘曲阜地多諸國重耳小白錫用殊禮蕭
何優贊拜之儀番君越公侯之爵姬劉以降代有令謨
宜崇典禮憲章自昔可授相國總百揆去都督內外諸
軍事大冢宰之號進公爵為主以隋州之崇業鄭州之
安陸城陽溫州之宜人應州之平靖上明順州之淮南
士州之永川昌州之廣昌安昌申州之義陽淮安息州
之新蔡建安豫州之汝南臨潁廣寧初安蔡州之蔡陽
郢州之漢東二十郡為隋國劔履上殿入朝不趨贊拜
不名備九錫之禮加璽綬遠遊冠相國印綠綬綬位在
諸侯王上隋國置丞相已下一依舊式高祖再讓不許

乃受王爵十郡而已詔進皇祖考爵並為王夫人為王
妃辛巳司馬消難以陳師寇江州刺史成休寧擊却之
大定元年春二月壬子今日巳前賜姓皆復其舊是日
周帝詔曰伊周作輔不辭殊禮之錫桓文為霸允應異
物之典所以表格天之勳彰不代之業相國隋王前加
典策式昭大禮固守謙光絲言未紿宜申顯命一如往
旨王功必先人賞存後已退讓為本誠乖朕意宜命百
辟盡詣王宮衆心克感必令允納如有表奏勿復以聞
癸丑文武百官詣閣敦勸高祖乃受甲寅策曰咨爾假
黃鉞使持節大丞相都督內外諸軍事上柱國大冢宰

隋王天覆地載藉人專以財成日往月來由王道而盈
昊五氣陶鑄萬物流形誰代土玄之工斯則大聖而已
曰惟先正翊亮皇朝種德積善載誕上相精采不代風
骨異人匡國濟時除凶撥亂百神奉職萬國宅心殷相
以先知悟人周輔乃弘道於代方斯蔑如也今將授王
典禮其敬聽朕命朕以不德早承丕緒上靈降禍夙遭
愍凶妖醜覬覦密圖社稷宮省之內疑慮驚心公受命先
皇志在匡弼輯諧內外潛運機衡姦人懾憚謀用丕顯
俾贅旒之危爲太山之固是公重造皇室作霸之基也
伊我祖考之代任寄已深入掌禁兵外司藩政文經武
略久播朝野戎軒大舉長驅晉魏平陽震熊羆之勢真
部耀貔豹之威初平東夏人情未一叢臺之北易水之
南西距井陘東至滄海比數千里舉袂如帷委以連城
建旌杖節教因其俗刑用輕典如泥從印翁草隨風此
又公之功也吳越不賓多歷年代淮海之外特非國有
爰整其旅出鎮於亳武以威物文以懷遠羣盜自奔外
戶不閉人黎慕義襁負而歸自北之風化行南國此又
公之功也宣帝御寓任重宗臣入典人屯外司九伐禁
衛勤巡警之務治兵得蒐狩之禮此又公之功也鑿駕
遊幸頻委留臺文武注意軍國諮稟萬事咸理及顯無

憂此又公之功也朕在諒闇公實總已磐石之宗姦回者衆招引無賴連結羣小往者國衰甫爾已創陰謀積惡數旬昆吾方稔泣誅罄甸宗廟以寧此又公之功也尉迴猖狂稱兵鄴邑欲長戟而指北闕強弩而圍南斗憑陵三魏之間震驚九州之半聚徒百萬悉成蛇豕淇水洹水一飲而竭人之死生翻繫凶豎壽之長短不由司命公乃戒彼鷹揚出車練卒誓蒼兕於河朔建旆水於東山口授兵書手畫行陣量敵制勝指日尅期諸將遵其成旨壯士感其大義輕死忘生轉鬪千里旗鼓奮發如火燎毛玄黃變漳河之水京觀比爵臺之峻百城氛祲一旦廓清此又公之功也青土連率跨據東秦藉負海之饒倚連山之險望三輔而將逐鹿指六國而願連鷄風雨之兵助鬼爲虐本根旣拔枝葉自殞屈法申恩示以六信此又公之功也申部殘賊充斥一隅蠅飛蟻聚攻州略地播以玄澤迷更知反服而舍之無費遺鏃此又公之功也宇文胄親則宗枝外藩巖邑影響鄴賊有同就燥迫脅吏人叛換城戍偏師討賊遂入網羅東之武牢有同囹圄事窮將軍如伏國刑此又公之功也檀讓席毗擁衆河外陳韓梁鄭宋衛鄒魯村落成梟獍之墟人庶爲豺狼之餌強以陵弱大則吞小城有畫

閉巷無行人授律出師隨機掃定讓旣授首毗亦梟懸
此又公之功也司馬消難與國親姻作鎮安陸性多嗜
欲意好貪聚屬城子女劫掠靡餘部入貨財多少具罄
擅誅刺舉之使專殺儀台之臣懼罪畏威動而內巽蠶
食郡縣鳩毒華夷聞有王師自投南裔帝唐崇山之罰
僅可方此大漢流禦之刑是亦相匹逋逃入藪荆郢用
安此又公之功也王謙在蜀翻爲厲階閉劔閣之門塞
靈關之宇自謂五丁復起萬夫莫向分闡推轂嘗不踰
時風馳席卷一舉大定擒斬兇惡掃地無遺此又公之
功也陳頊因循僞業自擅金陵屢遣醜徒赳赳江北公
指麾潘鎮無不摧殄方置文深之柱非止尉佗之拜此
又公之功也公有濟天下之勤重之以明德始於辟命
屈已登庸素業清徽聲掩廊廟雄規神略氣蓋朝野序
百揆而穆四門恥一匡之舉九合尊賢崇德尚齒貴功
錄舊旌善興亡繼絕寬猛相濟彝倫攸敘敦睦帝親崇
獎王室星象不拆陰陽自調玄冥祝融如奉太公之召
雨師風伯似應成王之宰祥風嘉氣觸石搖林瑞獸異
禽遊園鳴閣至功至德可大可久盡品物之和究杳冥
之極朕又聞之昔者明王設官胙土營丘四履得征五
侯參墟寵章異其禮物故藩屏作固垂拱責成沉嘿巖

廊不下堂席公道高往烈賞薄前王朕以眇身託于兆
人之上求諸故實甚用懼焉往加大典憲章在昔謙以
自牧未應朝禮日月不居便已隔歲特談物議其謂朕
何今進授相國總百揆以申州之義陽等十二郡為隋
國今命使持節太傅上柱國杞國公椿大宗伯大將軍
金城公趙嬰授相國印綬相國禮絕百辟任總羣官舊
職常典宜與事革昔堯臣大尉舜佐司空姬旦相周霍
光輔漢不居藩國唯在天朝其以相國總百揆去衆號
焉上所假節大丞相大冢宰印綬又加九錫其敬聽朕
後命以公執律脩德慎獄恤刑為其訓範人無異志是

用錫公大輅戎輅各一玄牡二駟公勤心地利所寶人
天崇本務農公私殷阜是用錫公衮冕之服赤舄副焉
公樂以移風雅以變俗遐邇胥悅天地咸和是用錫公
軒懸之樂六佾之舞公仁風德教覃及海隅荒忽幽遐
迴首內向是用錫公朱戶以居公水鏡人倫銓衡庶職
能官流詠遺賢必舉是用錫公納陛以登公執鈞於內
正性率下犯義無禮罔不屏黜是用錫公武賁之士三
百人公元本是用錫公鈇鉞各一公威嚴夏日精勵秋
霜猶夏必誅顧眄天壤掃清姦宄折衝無外是用錫公
彤弓一彤矢百盧弓十盧矢千惟公孝通神明肅恭祀

典尊嚴如在情切幽明是用錫公拒鬯一貞珪瓚副焉
隋國置丞相以下一遵舊式往欽哉其敬循往策祇服
大典簡恤爾庶功對揚我太祖之休命於是建臺置官
景辰詔王冕十有二旒建天子旌旗出警入蹕乘金根
車駕六馬備五時副車置旄頭雲罕樂舞八佾設鐘虞
宮懸王妃爲王后長子爲太子前後三讓乃受俄而周
帝以衆望有歸乃下詔曰元氣肇闢樹之以君有命不
恒所輔惟德天心人事選賢與能盡四海而樂推非一
人而獨有周德將盡妖孽遞生骨肉多虞藩維構釁影
響同惡過半區宇或小或大圖帝圖王則我祖宗之業
不絕如線相國隋王獻聖自天英華獨秀刑法與禮儀
同運文德共武功俱遠愛萬物其如已任兆庶以爲憂
手運璣衡躬命將士芟夷姦宄刷蕩氛祲化通冠帶威
震幽遐虞舜之大功二十未足相比姬發之合位三五
豈可足論况木行已謝火運旣興河洛出革命之符星
辰表代終之象煙雲改色笙簧變音獄訟咸歸謳歌盡
至且天地合德日月貞明故以稱大爲王照臨下土朕
雖寡昧未達變通幽顯之情皎然易識今便祇順天命
出遜別宮禪位於隋一依唐虞漢魏故事高祖三讓不
許遣兼太傅上柱國杞國公椿奉冊曰咨爾相國隋王

粵若上古之初爰啓清濁降符授聖爲天下君事上帝
而理兆人和百靈而利萬物非以區寓之富未以宸極
爲尊大庭軒轅以前驪連赫胥之日咸以無爲無欲不
將不迎退哉其詳不可聞已厥有載籍遺文可觀聖莫
逾於堯美未過於舜堯得太尉已作運衡之篇舜遇司
空便敘精華之竭彼褰裳脫屣貳宮設饗百辟歸禹若
帝之初斯蓋上則天時不敢不授下祗天命不可不受
湯代於夏武革於殷干戈揖讓雖復異揆應天順人其
道靡異自漢迄晉有魏至周天曆逐獄訟之歸神鼎隨
謳歌之去道高者稱帝祿盡者不王與夫文祖神宗無
以別也周德將盡禍難頻興宗戚姦回咸將竊發顧瞻
宮闕將圖宗社藩維連率逆亂相尋搖蕩三方不合如
礪蛇行鳥攫投足無所王受天明命叡德在躬救頽運
之艱匡墜地之業拯大川之溺撲燎原之火除羣凶於
城社廓妖氛於遠服至德合於造化神用洽於天壤八
極九野萬方四裔圓首方足罔不樂推往歲長星夜掃
經天晝見八風比夏后之作五緯同漢帝之聚除舊之
徵昭然在上近者赤雀降祉玄龜效靈鐘石變音蛟魚
出穴布新之貺煥焉在下九區歸往百靈協贊人神屬
望我不獨知仰祗皇靈俯順人願今敬以帝位禪於爾

躬天祚告窮天祿永終於戲王宜允執厥和儀刑典訓
升圓丘而敬蒼昊御皇極而撫黔黎副率土之心恢無
疆之祚可不盛歟遣大宗伯大將軍金城公趙嬰奉皇
帝璽紱百官勸進高祖乃受焉

開皇元年二月甲子上自相府常服入宮備禮卽皇帝
位於臨光殿設壇於南郊遣使柴燎告天是日告廟大
赦改元京師慶雲見易周氏官儀依漢魏之舊以柱國
相國司馬渤海郡公高頴爲尚書左僕射兼納言相國
司錄沁源縣公虞慶則爲內史監兼吏部尚書相國內
郎咸安縣男李德林爲內史令上開府漢安縣公章世
康爲禮部尚書上開府義寧縣公元暉爲都官尚書開
府民部尚書昌國縣公元巖爲兵部尚書上儀同司宗
長孫毗爲工部尚書上儀同司會楊尚希爲度支尚書
上柱國雍州牧邗國公楊惠爲左衛大將軍乙丑追尊
皇考爲武元皇帝廟號太祖皇妣爲元明皇后遣八使
巡省風俗景寅脩廟社立王后獨孤氏爲皇后王太子
勇爲皇太子丁卯以大將軍金城郡公趙嬰爲尚書右
僕射上開府濟陽侯伊婁彥恭爲左武侯大將軍己巳
以周帝爲介國公邑五千戶爲隋室賓旌旗車服禮樂
一如其舊上書不爲表答表不稱詔周氏諸王盡降爲

公辛未以皇弟同安郡公爽爲雍州牧乙亥封皇弟邵國公慧爲滕王同安公爽爲衛王皇子廌門公廣爲晉王俊爲秦王秀爲越王諒爲漢王以上柱國并州總管申國公李穆爲太師上柱國鄧國公竇熾爲太傅上柱國幽州總管任國公于翼爲太尉觀國公田仁恭爲太子太師武德郡公柳敏爲太子太保濟南郡公孫恕爲太子少傅開府蘇威爲太子少保丁丑以晉王廣爲并州總管以陳留郡公楊智積爲察王興城郡公楊靜爲道王戊寅以官牛五千頭分賜貧人三月辛巳高平獲赤雀太原獲蒼鳥長安獲白雀各一宣仁門槐樹連理梁枝內附壬午白狼國獻方物甲申太白晝見乙酉又晝見以上柱國元景山爲安州總管丁亥詔犬馬器玩口味不得獻上戊子弛山澤之禁以上開府當亭縣公賀若弼爲楚州總管和州刺史新義縣公韓擒爲廬州總管己丑蓋屋縣獻連理樹植之宮庭辛卯以上柱國神武郡公竇毅爲定州總管戊戌以太子少保蘇威兼納言吏部尚書餘官如故庚子詔曰自古帝王受終革代建侯錫爵多與運遷朕應籙受圖君臨海內載懷公革事有不同然則前帝後王俱在兼濟立功立事爵賞仍行苟利於時其致一揆何謂物我之異無計今古之

殊其前代品爵悉可依舊丁未梁主蕭歸使其太子蕭巖司空劉義來賀四月辛巳大赦壬午太白歲星晝見戊戌太常散樂並放爲百姓禁雜樂百戲辛丑陳散騎常侍韋鼎兼通直散騎常侍王瑳來聘于周至而上巳受禪致之介國是月發稽胡脩築長城二旬而罷五月戊子封邗國公楊雄爲廣平王永康郡公楊弘爲河間王辛未介國公薨上舉哀於朝堂以其族人洛嗣焉六月癸未詔以初受天命赤雀降祥五德相生赤爲火色其郊及社廟衣服冕之儀而朝會之服旗幟犧牲盡令尚赤戎服以黃秋七月乙卯上始服黃百寮畢賀庚午軻鞞酋長貢方物八月壬午廢東京官突厥阿波可汗遣使貢方物甲午遣行軍元帥樂安公元諧擊吐谷渾於青海破而降之九月戊申戰亡之案遣使賑給庚午陳將周羅暉攻陷胡墅蕭摩訶寇江北辛未以越王秀爲益州總管改封爲蜀王壬申以上柱國薛國公長孫覽上柱國宋安公元景山並爲行軍元帥以伐陳仍命尚書左僕射高潁節度諸軍突厥沙鉢略可汗遣使貢方物是月行五銖錢冬十月乙酉百濟王扶餘昌遣使來賀授昌上開府儀同三司帶方郡公戊子行新律壬辰行幸岐州十一月乙卯以永昌郡公竇榮定爲右武

侯大將軍丁卯遣兼散騎侍郎鄭撫使於陳己巳有流星聲如墮牆光燭于地十二月戊寅以申州刺史爾朱敞爲金州總管甲申以禮部尚書韋世康爲吏部尚書己丑以柱國元袞爲鄜州總管興執郡公衛玄爲淮州總管庚子至自岐州壬寅高麗王高陽遣使朝貢授陽大將軍遼東郡公太子太保柳敏卒

二年春正月癸丑幸上柱國王誼第庚申辛安成長公主第陳宣帝殂子叔寶立辛酉置河北道行臺尚書省於於并州以晉王廣爲尚書令置河南道行臺尚書省於洛州以秦王俊爲尚書令置西南道行臺尚書省於益州以蜀王秀爲尚書令戊辰陳遣使請和歸我胡墅辛未高麗百濟並遣使貢方物甲戌詔舉賢良二月己丑詔高頰等班師庚寅以晉王廣爲左武衛大將軍秦王俊爲右武衛大將軍餘官並如故辛卯幸趙國公獨孤陀第庚子京師雨土三月戊申開渠引杜陽水於三時原四月丁丑以寧州刺史竇榮定爲左武侯大將軍庚寅大將軍韓僧壽破突厥於雞頭山上柱國李充破突厥於河北山五月戊申以上柱國開府長孫平爲度支尚書己酉旱上親省囚徒其日大雨己未高竇寧寇平州突厥入長城庚申以豫州刺史皇甫績爲都官尚書

壬戌太尉任國公于翼薨甲子改傳國璽曰受命璽六月壬午以太府卿蘇孝慈爲兵部尚書雍州牧衛王爽爲原州總管甲申使使弔於陳國乙酉上柱國李充破突厥於馬邑戊子以上柱國叱李長又爲蘭州總管辛卯以上開府爾朱敞爲徐州總管景申詔曰朕祗奉上玄君臨萬國屬生人之敝處前代之宮常以爲作之者勞居之者逸改創之事心未遑也而王公大臣陳謀獻策咸云羲農以降至于姬劉有當代而屢遷無革命而不徙曹馬之後特見因循乃末代之宴安非往聖之宏義此城從漢彫殘日夕屢爲戰場舊經喪亂今之宮室事近權宜又非謀筮從龜瞻星揆日不足建皇王之邑合大衆所聚論變通之數具幽顯之情同心固請詞情深切然則京師百官之府四海歸向非朕一人之所獨有苟利於物其可違乎且殷之五遷恐人盡死是則以吉凶之士制長短之命謀新去故如農望秋雖暫劬勞其究安宅今區宇寧一陰陽順序安安以遷勿懷胥怨龍首山川原秀麗卉物滋阜卜食相土宜建都邑定鼎之基永固無窮之業在斯公私府宅規模遠近營構資費隨事條奏仍詔左僕射高頴將作大匠劉龍鉅鹿郡公賀婁子幹太府少卿高龍義等創造新都秋八月癸

已以左武侯大將軍竇榮定爲秦州總管十月癸酉皇太子勇屯兵咸陽以備胡庚寅上疾愈享百寮於觀德殿賜錢帛皆任其自取盡力而出辛卯以營新都副監賀婁子幹爲工部尚書十一月景午高麗遣使獻方物十二月辛未上講武於後園甲戌上柱國竇毅卒景子名新都曰大興城乙酉遣沁源公虞慶則屯弘化備胡突厥寇周槃行軍總管達奚長儒擊之爲虜所敗景戌賜國子生經明者束帛丁亥親錄囚徒

三年春正月庚子將入新都大赦天下禁大刀長稍癸亥高麗遣使來朝二月己巳朔日有蝕之壬申宴北道

勲人癸酉陳遣兼散騎常侍賀徹兼通直散騎常侍蕭褒來聘突厥寇邊甲戌涇陽獲毛龜癸未以左衛大將軍李禮成爲右武衛大將軍三月丁未上柱國鮮虞縣公謝慶恩卒己酉以上柱國達奚長儒爲蘭州總管景辰雨常服入新都京師醴泉出丁巳詔購求遺書於天下庚申宴百寮班賜各有差癸亥城榆關夏四月己巳上柱國建平郡公于義卒庚午吐谷渾寇臨洮洮州刺史皮子信死之辛未高麗遣使來朝壬申以尚書右僕射趙斐兼內史令丁丑以滕王瓚爲雍州牧己卯衛王爽破突厥於白道庚辰行軍總管陰壽破高寶寧於黃

龍甲申早上親祈雨於國城之西南景茂詔天下勸學
行禮以濟北郡公梁遠爲汶州總管己丑陳郢州城主
張子譏遣使請降上以和好不納辛卯遣兼散騎常侍
薛舒兼通直散騎常侍王劭使於陳癸巳上親雩甲午
突厥遣使來朝五月癸卯行軍總管李晃破突厥於摩
那渡口甲辰高麗遣使來朝乙巳梁太子蕭琮來賀遷
都丁未靺鞨貢方物戊申幽州總管陰壽卒辛酉有事
於方澤壬戌行軍元帥竇榮定破突厥及吐谷渾於涼
州景寅赦黃龍死罪己下六月庚午以衛王爽子集爲
遂安郡王戊寅突厥遣使請和庚辰行軍總管梁遠破
吐谷渾於爾汗山斬其名王于申以晉州刺史燕榮爲
青州總管己丑以河間王弘爲寧州總管乙未幸安成
長公主第秋七月辛丑以豫州刺史周搖爲幽州總管
壬戌詔曰行仁蹈義名教所先厲俗敦風宜見褒獎往
者山東河表經此妖亂孤城遠守多不自全濟陰太守
杜猷身陷賊徒命懸寇手郡省事范臺攻傾產營護免
其戮辱眷言誠節實有可嘉宜超恒賞用明沮勸臺攻
可大都督假湘州刺史丁卯日有蝕之八月丁丑靺鞨
貢方物己卯以右武衛大將軍李禮成爲襄州總管壬
午遣尚書左僕射高頴出寧州道內史監虞慶則出原

州道並爲行軍元帥以擊胡戊子上有事於太社九月
壬子幸城東觀稼穀癸丑大赦天下冬十月甲戌廢河
南道行臺省以秦王俊爲秦州總管十一月己酉發使
巡省風俗因下詔曰朕君臨區宇深思治術欲使生人
從化以德代刑求草萊之善旌閭里之行民間情僞咸
欲備聞已詔使人所在賑恤揚鑣分路將遍四海必令
爲朕耳目如有文武才用未爲時知宜以禮發遣朕將
銓擢其有志節高妙越等超倫亦仰使人就加旌異令
一行一善獎勵於人遠近官司遇邇風俗巨細必紀還
日奏聞庶使不出戶庭坐知萬里庚辰陳遣散騎常侍
周墳通直散騎常侍袁彥之來聘陳主知上之貌異世人
使彥畫像持去甲午罷天下諸郡閏十二月乙卯遣兼
散騎常侍唐令則通直散騎常侍魏澹使於陳戊午以
上柱國竇榮定爲右武衛大將軍刑部尚書蘇威爲民
部尚書

四年春正月甲子日有蝕之己巳有事於太廟辛未
有事於南郊壬申梁王蕭歸來朝甲戌大射於北苑十日
而罷壬午齊州水辛卯渝州獲獸似麋一角同蹄壬辰
班新曆二月乙巳上餞梁王於霸上丁未靺鞨貢方物
突厥蘇尼部男女萬餘人來降庚戌幸隴州突厥可汗

阿史那玷率其屬來降夏四月己亥勅總管刺史父母
及子年十五已上不得將之官庚子以吏部尚書虞慶
則爲尚書右僕射瀛州刺史楊尚希爲兵部尚書毛州
刺史劉仁恩爲刑部尚書甲辰以上柱國叱李長又爲
信州總管丁未宴突厥高麗吐谷渾使者於大興殿丁
巳以上大將軍賀婁子幹爲榆關總管五月癸酉契丹
主莫賀弗遣使請降拜大將軍景子以柱國馮昱爲汾
州總管乙酉以汴州刺史呂仲泉爲延州總管六月庚
子降囚徒乙巳以鴻臚卿乙弗寔爲翼州總管上柱國
豆盧勣爲夏州總管壬子開渠自渭達河以通運漕戊
午秦王俊來朝秋七月景寅陳遣兼散騎常侍謝泉兼
通直散騎常侍賀德基來聘八月甲午遣十使巡省天
下戊戌衛王爽來朝是日以秦王俊納妃宴百寮班賜
各有差壬寅上柱國太傅鄧國公竇熾薨丁未宴秦王
官屬賜物各有差壬子享陳使乙卯陳將夏侯苗請降
上以通和不納九月甲子幸襄國公主第乙丑幸霸水
觀漕渠賜督役者帛各有差己巳上親錄囚徒庚午契
丹內附甲戌駕幸洛陽關內饑也癸未太白晝見冬十
一月壬戌遣兼散騎常侍薛道衡通直散騎常侍豆盧
寔使於陳癸亥以榆關總管賀婁子幹爲雲州總管

五年春正月戊辰詔行新禮三月戊午以尚書左僕射
高頌爲左領軍大將軍上柱國宇文忻爲右領軍大將
軍夏四月甲午契丹主多彌遣使貢方物壬寅上柱國
王誼謀反伏誅乙巳詔徵山東馬榮伯等六儒戊申車
駕至自洛陽五月甲申詔置義倉梁主蕭巋殂其太子
琮嗣立遣上大將軍元契使于突厥阿波可汗秋七月
庚申陳遣兼散騎常侍王話兼通直散騎常侍阮卓來
聘丁丑以上柱國宇文慶爲涼州總管壬午突厥沙鉢
略上表稱臣八月景戌沙鉢略可汗遣子庫合真特勤
來朝甲辰河南諸州水遣民部尚書邳國公蘇威賑給
之戊申有流星數百四散而下巳酉幸栗園九月丁巳
至自栗園乙丑改鮑波曰杜波霸水爲滋水陳將湛文
徹寇和州儀同三司費寶首獲之景子遣兼散騎常侍
李若兼通直散騎常侍崔君贍使於陳冬十月壬辰以
上柱國楊素爲信州總管朔州總管吐萬緒爲徐州總
管十一月甲子以上大將軍源雄爲朔州總管丁卯晉
王廣來朝十二月丁未降囚徒戊申以上柱國達奚長
儒爲夏州總管

六年春正月甲子党項羌內附庚午班曆於突厥辛未
以柱國韋洸爲安州總管壬申遣民部尚書蘇威巡省

山東二月乙酉山南荆浙七州水遣前工部尚書長孫毗賑恤之景戌制刺史上佐每歲暮更入朝上考課丁亥發丁男十一萬脩築長城二旬而罷乙未以上柱國崔弘度爲襄州總管庚子大赦天下三月己未洛陽男子高德上書請上爲太上皇傳位皇太子上曰朕承天命撫育蒼生日旰孜孜猶恐不逮豈學近代帝王事不師古傳位於子自求逸樂者哉癸亥突厥沙鉢略遣使貢方物夏四月己亥陳遣兼散騎常侍周礪兼通直散騎常侍江椿來聘秋七月辛亥河南諸州水乙丑京師雨毛如馬鬣尾長者二尺餘短者六七寸八月辛卯關

內七州旱免其賦稅遣散騎常侍裴豪兼通直散騎常侍劉顓聘于陳戊申上柱國太師申國公李穆薨閏月己酉以河州刺史段文振爲蘭州總管丁卯皇太子鎮洛陽辛未晉王廣秦王俊並來朝景子上柱國郟國公梁士彥上柱國杞國公宇文忻柱國舒國公劉昉以謀反伏誅上柱國許國公宇文善坐事除名九月辛巳上素服御射殿詔百寮射賜梁士彥三家資物景戌上柱國宋安郡公元景山卒庚子以上柱國李詢爲隰州總管辛丑詔大象已來死事之家咸令賑恤冬十月己酉以河北道行臺尚書令并州總管晉王廣爲雍州牧餘

官如故兵部尚書楊尚希爲禮部尚書癸丑置山南道
行臺尚書省於襄州以秦王俊爲尚書令景辰以芳州
刺史駱平難爲疊州刺史衡州總管周法尚爲黃州總
管甲子甘露降于華林園

七年春正月癸巳有事于太廟乙未制諸州歲貢三人
二月丁巳祀朝日于東郊己巳陳遣兼散騎常侍王亨
兼通直散騎常侍王昶來聘壬申車駕幸醴泉宮是月
發丁男十萬餘脩築長城二旬而罷夏四月己酉幸晉
王第庚戌於揚州開山陽瀆以通運漕突厥沙鉢略可
汗卒其子雍虞閭嗣立是爲都藍可汗癸亥頒青龍符

於東方總管刺史西方以騶虞南方以朱雀北方以玄
武甲戌遣兼散騎常侍楊同兼通直散騎常侍崔儼使
于陳以民部尚書蘇威爲吏部尚書五月乙亥朔日有
蝕之己卯雨石于武安滏陽間十餘里秋七月己丑衛
王爽薨上發喪於門下外省八月景午以懷州刺史源
雄爲朔州總管庚申梁主蕭琮來朝九月乙酉梁安平
王蕭巖掠於其國以奔陳辛卯廢梁國曲赦江陵以梁
主蕭琮爲柱國封莒國公冬十月庚申行幸同州以先
帝所居降囚徒癸亥幸蒲州景寅宴父老上極懽曰此
間人物衣服鮮麗容止閑雅良由仕宦之鄉陶染成俗

也十一月甲午幸馮翊親祠故社父老對詔失旨上大
怒免其縣官而去戊戌至自馮翊

隋書卷一終

隋書卷二

帝紀第二

特進臣魏徵上

皇明朝列大夫國子監祭酒臣方從哲
承直郎國子監司業臣楊道賓等奉

勅重較刊
皇明朝列大夫國子監祭酒臣吳士元
承德郎司業仍加俸一級臣黃錦等奉

高祖下

八年春正月乙亥陳遣散騎常侍袁雅兼通直散騎常
侍周止水來聘二月庚子鎮星入東井辛酉陳人寇硤
州三月辛未上柱國隴西郡公李詢卒壬申以成州刺
史姜須達爲會州總管甲戌遣兼散騎常侍程尚賢兼

通直散騎常侍韋暉使于陳戊寅詔曰昔有苗不賓唐
堯薄伐孫皓僭虐晉武行誅有陳竊據江表逆天暴物
朕初受命陳項尚存思欲教之以道不以龔行爲令往
來脩睦望其遷善時日無幾豐惡已聞厚納叛亡侵犯
城戍勾吳闖越肆厥殘忍于時王師大舉將一車書陳
項反地收兵深懷震懼責躬請約俄而致殞矜其喪禍
仍詔班師叔寶承風因求繼好載佇克念共敦行李每
見珪璫入朝輪軒出使何嘗不殷勤曉諭戒以惟新而
狼子之心出而彌野威侮五行怠棄三正誅翦骨肉夷
滅才良據手掌之地恣溪壑之險劫奪閭閻資產俱竭
驅蹙內外勞役弗已徵責女子擅造宮室日增月益止
足無期帷薄嬪嬙有踰萬數寶衣玉食窮奢極侈淫聲
樂飲俾晝作夜斬直言之客滅無罪之家剖人之肝分
人之血欺天造惡祭鬼求恩歌儻衢路酣醉宮闈盛粉
黛而執干戈曳羅綺而呼警蹕躍馬振策從旦至昏無
所經營馳走不息負甲持仗隨逐徒行追而不及卽加
罪譴自古昏亂罕或能比介士武夫饑寒力役筋髓罄
於土木性命俟於溝渠君子潛逃小人得志家家隱殺
戮各各任聚斂天災地孽物怪人妖衣冠鉗口道路以
目傾心翹足誓告於我日月以冀文奏相尋重以背德

違言搖蕩疆場巴峽之下海澨已西江北江南爲鬼爲
蜚死隴窮發掘之酷生居極穰斃之苦抄掠人畜斷截
樵蘇市井不立農事廢寢歷陽廣陵窺覲相繼或謀圖
城邑或劫剝吏人晝伏夜遊鼠竄狗盜彼則羸兵敝卒
來必就擒此則重門設險有勞藩捍天之所覆無非朕
臣每關聽覽有懷傷惻有梁之國我南藩也其君入朝
潛相招誘不顧朕恩士女深迫脅之悲城府致空虛之
歎非直朕居人上懷此無忘旣而百辟屢以爲言兆庶
不堪其請豈容對而不誅忍而不救近日秋始謀欲弔
人益部樓船盡令東驚便有神龍數十騰躍江流引伐
罪之師向金陵之路船住則龍止船行則龍去三日之
內三軍皆覩豈非蒼旻愛人幽明展事降神先路協贊
軍威以上天之靈助戡定之力便可出師授律應機誅
殄在斯舉也永清吳越其將士糧仗水陸資須期會進
止一准別勅秋八月丁未河北諸州饑遣吏部尚書蘇
威賑恤之九月丁丑宴南征諸將頒賜各有差癸巳嘉
州言龍見冬十月己亥太白出西方己未置淮南行臺
省於壽春以晉王廣爲尚書令辛酉陳遣兼散騎常侍
王琬兼通直散騎常侍許善心來聘拘留不遣甲子將
伐陳有事於太廟命晉王廣秦王俊清河公楊素並爲

行軍元帥以伐陳於是晉王廣出六合秦王俊出襄陽
清河公楊素出信州荊州刺史劉仁恩出江陵宜陽公
王世積出斬春新義公韓擒虎出廬江襄邑公賀若弼
出吳州落叢公燕榮出東海合總管九十兵五十一萬
八千皆受晉王節度東接滄海西拒巴蜀旌旗舟楫橫
亘數千里曲赦陳國有星字于牽牛十一月丁卯車駕
餞師詔購陳叔寶位上柱國萬戶公乙亥行幸定城陳
師誓衆景子幸河東十二月庚子至自河東

九年春正月己巳白虹夾日辛未賀若弼拔陳京口韓
擒虎拔陳南豫州癸酉以尚書右僕射虞慶則爲右衛
大將軍景子賀若弼敗陳師於蔣山獲其將蕭摩訶韓
擒虎進師入建鄴獲其將任蠻奴獲陳主叔寶陳國平
合州三十郡一百縣四百癸巳遣使持節巡撫之二月
乙未廢淮南行臺省景申制五百家爲鄉正一人百家
爲里長一人丁酉以襄州總管韋世康爲安州總管夏
四月己亥幸驪山親勞旋師乙巳三軍凱入獻俘於太
廟拜晉王廣爲太尉庚戌上御廣陽門宴將士頒賜各
有差辛亥大赦天下己未以陳都官尚書孔範散騎常
侍王嗟王儀御史中丞沈觀等邪佞於其主以致亡滅
皆投之邊裔辛酉以信州總管楊素爲荊州總管吏部

侍郎宇文敬爲刑部尚書宗正少卿楊昇爲工部尚書
壬戌詔曰往以吳越之野羣黎塗炭于戈方用積習未
寧今幸土大同含生遂性太平之法方可流行凡我臣
僚澡身浴德開通耳目宜從茲始喪亂已來緬將十載
君無君德臣失臣道父有不慈子有不孝兄弟之情或
薄夫婦之義或違長幼失序尊卑錯亂朕爲帝王志存
愛養時有臻道不敢寧息內外職位遐邇黎人家家自
脩人人克念使不軌不法蕩然俱盡兵可立威不可不
戢刑可助化不可專行禁衛九重之餘鎮守四方之外
戎旅軍器皆宜停罷伐路旣夷羣方無事武力之子俱
可學文人間甲仗悉皆除毀有功之臣降情文藝家門
子姪各守一經令海內翕然高山仰止京邑庠序爰及
州縣生徒受業升進於朝未有灼然明經高第此則教
訓不篤考課未精明勒所由隆茲儒訓官府從宦丘園
素士心迹相表寬弘爲念勿爲跼促乖我皇猷朕君臨
區宇於茲九載開直言之路披不諱之心形於顏色勞
於興寢自頃逞藝論功昌言乃衆推誠切諫其事甚疎
公卿士庶非所望也各啓至誠匡茲不逮見善必進有
才必舉無或噤嘿退有後言頒告天下咸悉此意閏月
甲子以安州總管韋世康爲信州總管丁丑頒木魚符

於總管刺史雌一雄一巳卯以吏部尚書蘇威爲尚書
右僕射六月乙丑以荊州總管楊素爲納言丁丑以吏
部侍郎盧愷爲禮部尚書時朝野物議咸願登封秋七
月景午詔曰豈可命一將軍除一小國遐邇注意便謂
太平以薄德而封名山用虛言而干上帝非朕攸聞而
今以後言及封禪宜卽禁絕八月壬戌以廣平王雄爲
司空冬十一月壬辰考使定州刺史豆盧通等上表請
封禪上不許庚子以右衛大將軍虞慶則爲右武侯大
將軍右領軍將軍李安爲右領軍大將軍甲寅降囚徒
十二月甲子詔曰朕祇承天命清蕩萬方百王衰敝之
後兆庶澆淳之日聖人遺訓掃地俱盡制禮作樂今也
其時朕情存古樂深思雅道鄭衛淫聲魚龍雜戲樂府
之內盡以除之今欲更調律呂改張琴瑟且妙術精微
非因教習工人代掌止傳糟粕不足達神明之德論天
地之和區域之間奇才異議天知神授何代無哉蓋晦
迹於非時俟昌言於所好宜可搜訪速以奏聞庶覩一
藝之能共就九成之業仍詔太常牛弘通直散騎常侍
許善心祕書丞姚察通直郎虞世基等議定作樂巳巳
以黃州總管周法尚爲永州總管

十年春正月乙未以皇孫昭爲河南王楷爲華陽王二

月庚申幸并州夏四月辛酉至自并州五月乙未詔曰
魏末喪亂寓縣瓜分役車歲動未遑休息兵士軍人權
置坊府南征北伐居處無定家無完堵地罕包桑恒爲
流寓之人竟無鄉里之號朕甚愍之凡是軍人可悉屬
州縣墾田籍帳一與民同軍府統領宜依舊式罷山東
河南及北方緣邊之地新置軍府六月辛酉制人年五
十免役收庸癸亥以靈州總管王世積爲荊州總管浙
江刺史元胄爲靈州總管秋七月癸卯以納言楊素爲
內史令庚戌上親錄囚徒辛亥高麗遼東郡公高陽卒
壬子吐谷渾遣使來朝八月壬申遣柱國襄陽郡公韋
洸上開府東萊郡公王景並持節巡撫嶺南百越皆服
冬十月甲子頒木魚符於京師官五品已上戊辰以永
州總管周法尚爲桂州總管十一月辛卯幸國學頒賜
各有差景午契丹遣使朝貢辛丑有事於南郊是月婺
州人汪文進會稽人高智慧蘇州人沈玄愔皆舉兵反
自稱天子署置百官樂安蔡道人蔣山李稜饒州吳代
華永嘉沈孝澈泉州王國慶餘杭楊寶英交趾李春等
皆自稱大都督攻陷州縣詔上柱國內史令越國公楊
素討平之

十一年春正月丁酉以平陳所得古器多爲妖變悉命

毀之辛丑高麗遣使朝貢景午皇太子妃元氏薨上舉
哀於文思殿二月戊午吐谷渾遣使貢方物以大將軍
蘇孝慈爲工部尚書景子以臨穎令劉曠治術尤異擢
爲莒州刺史己卯突厥遣使獻七寶益辛巳晦日有蝕
之三月壬午遣通事舍人若干洽使于吐谷渾癸未以
幽州總管周搖爲壽州總管朔州總管吐萬緒爲夏州
總管夏四月戊午突厥雍虞闕可汗遣其特勒來朝五
月甲子高麗遣使貢方物癸卯詔百官悉詣朝堂上封
事乙巳以右衛將軍元旻爲左衛大將軍秋七月己丑
以柱國杜彥爲洪州總管八月壬申幸栗園滕王瓚薨
乙亥至自栗園上柱國沛國公鄭譯卒十二月景辰鞞
鞞遣使貢方物

十二年春正月壬子以蘇州刺史皇甫績爲信州總管
宣州刺史席代雅爲廣州總管二月己巳以蜀王秀爲
內史令兼右領軍大將軍漢王諒爲雍州牧右衛大將
軍夏四月辛卯以壽州總管周搖爲襄州總管五月辛
亥廣州總管席代雅卒秋七月乙巳尚書右僕射邳國
公蘇威禮部尚書容城縣侯盧愷並坐事除名壬戌幸
昆明池其日還宮己巳有事於太廟壬申晦日有蝕之
八月甲戌制天下死罪諸州不得便決皆令大理覆治

乙亥幸龍首池癸巳制宿衛者不得輒離所守丁酉上
柱國夏州總管楚國公豆盧勣卒戊戌上親錄囚徒九
月丁未以工部尚書楊昇爲吳州總管冬十月丁丑以
遂安王集爲衛王壬午有事于太廟至太祖神主前上
流涕嗚咽悲不自勝十一月辛亥有事於南郊壬子宴
百寮頒賜各有差己未上柱國新義郡公韓擒虎卒庚
申以豫州刺史權武爲潭州總管甲子百寮大射於武
德殿十二月癸酉突厥遣使來朝乙酉以上柱國內史
令楊素爲尚書右僕射己酉吐谷渾靺鞨並遣使貢方
物

十三年春正月乙巳上柱國鄆國公韓達業卒景午契
丹奚霫室韋並遣使貢方物壬子親祀感帝己未以信
州總管韋世康爲吏部尚書壬戌行幸歧州二月景子
詔營仁壽宮丁亥至自歧州戊子宴考使於嘉則殿己
卯立皇孫暕爲豫章王戊子晉州刺史南陽郡公賈悉
達隰州總管撫寧郡公韓延等以賄伏誅己丑制坐事
去官者配流一年丁酉制私家不得隱藏緯候圖讖夏
四月癸未制戰亡之家給復一年五月癸亥詔人間有
撰集國史臧否人物者皆令禁絕秋七月戊申靺鞨遣
使貢方物壬子左衛大將軍雲州總管鉅鹿郡公賀婁

子幹卒丁巳幸昆明池戊辰晦日有蝕之九月景辰降
囚徒庚申以邵國公楊綸爲滕王乙丑以柱國杜彥爲
雲州總管冬十月乙卯上柱國華陽郡公梁彥先卒
十四年夏四月乙丑詔曰在昔聖人作樂崇德移風易
俗於斯爲大自晉氏播遷兵戈不息雅樂流散年代已
多四方未一無由辨正賴上天鑒臨明神降福拯茲塗
炭安息蒼生天下大同歸於治理遺文舊物皆爲國有
比命所司總令研究正樂雅聲詳考已訖宜卽施用見
行者停人間音樂流僻日久棄其舊體競造繁聲浮宕
不歸遂以成俗宜加禁約務存其本五月辛酉京師地
震關內諸州旱六月丁卯詔省府州縣皆給公廨田不
得治生與人爭利秋七月乙未以邵國公蘇威爲納言
八月辛未關中大旱人饑上幸戶口就食於洛陽九月
己未以齊州刺史樊子蓋爲循州總管丁巳以基州刺
史崔仲方爲會州總管冬閏十月甲寅詔曰齊梁陳往
昔創業一方綿歷年代既宗祀廢絕祭奠無主興言矜
念良以愴然莒國公蕭琮及高仁英陳叔寶等宜令以
時脩其祭祀所須器物有司給之乙卯制外官九品已
上父母及子年十五已上不得將之官十一月壬戌制
州縣佐吏三年一代不得重任癸未有星孛于角亢十

二月乙未東巡狩

五年春正月壬戌車駕次齊州親問疾苦景寅旅王符山庚午上以歲旱祠太山以謝愆咎大赦天下二月景辰收天下兵器敢有私造者坐之關中緣邊不在其例丁巳上柱國蔣國公梁睿卒三月己未至自東巡狩望祭五嶽海瀆丁亥幸仁壽宮營州總管韋藝卒夏四月己丑朔大赦天下甲辰以趙州刺史楊達爲工部尚書丁未以開府儀同三司韋沖爲營州總管五月癸酉吐谷渾遣使朝貢丁亥制京官五品已上佩銅魚符六月戊子詔鑿底柱庚寅相州刺史豆盧通貢綾文布命

焚之於朝堂乙未林邑遣使來貢方物辛丑詔名山大川未在祀典者悉祠之秋七月乙丑晉王諱獻毛龜甲戌遣邳國公蘇威巡省江南戊寅至自仁壽宮辛巳制九品已上官以理去職者聽並執笏冬十月戊子以吏部尚書韋世康爲荊州總管十一月辛酉幸溫湯乙丑至自溫湯十二月戊子勅盜邊糧一升已上皆斬並籍沒其家己丑詔文武官以四考交代

十六年春正月丁亥以皇孫裕爲平原王筠爲安成王暕爲安平王恪爲襄城主該爲高陽王韶爲建安王暕爲潁川王夏五月丁巳以懷州刺史龐晃爲夏州總管

蔡陽縣公姚辯爲靈州總管六月甲午制工商不得進
仕并州大蝗辛丑詔九品已上妻五品已上妻夫亡不
得改嫁秋八月景戌詔決死罪者三奏而後行刑冬十
月己丑幸長春宮十一月壬子至自長春宮

十七年春二月癸未太平公史萬歲擊西寧羌平之庚
寅幸仁壽宮庚子上柱國王世積討桂州賊李光仕平
之壬寅河東王昭納妃宴羣臣頒賜各有差三月景辰
詔曰分職設官共理時務班位高下各有等差若所在
官人不相敬憚多自寬縱事難克舉諸有毀失雖備科
條或據律乃輕論情別重不卽決罪無以懲肅其諸司

論屬官若有愆犯聽於律外斟酌決杖辛酉上親錄囚
徒癸亥上柱國彭國公劉昶以罪伏誅庚午遣治書侍
御史柳彧皇甫誕巡省河南河北夏四月戊寅頒新曆
壬午詔曰周曆告終羣凶作亂疊起蕃服毒被生人朕
受命上玄廓清區宇聖靈垂祐文武同心申明公穆鄖
襄公孝寬廣平王雄蔣國公睿楚國公勣齊國公頴越
國公素魯國公慶則新寧公長義宜陽公世積趙國公
羅雲隴西公詢廣業公景真昌公振沛國公譚項城公
子相鉅鹿公子幹等登庸納揆之時草昧經綸之日丹
誠大節心盡帝圖茂績殊勲力宣王府宜弘其門緒與

國同休其世子世孫未經州任者宜量才升用庶享榮
位世祿無窮五月宴百寮於王女泉頒賜各有差已巳
蜀王秀來朝高麗遣使貢方物甲戌以左衛將軍獨孤
羅雲爲涼州總管閏月己卯羣鹿入殿門馴擾侍衛之
內秋七月丁丑桂州人李代賢反遣右武侯大將軍虞
慶則討平之丁亥上柱國并州總管秦王俊坐事免以
王就第戊戌突厥遣使貢方物八月丁卯荊州總管上
庸郡公韋世康卒九月甲申至自仁壽宮庚寅上謂侍
臣曰禮主於敬皆當盡心黍稷非馨貴在祇肅廟庭設
樂本以迎神齋祭之日觸目多感當此之際何可爲心
在路奏樂禮未爲允羣下公卿士宜更詳之冬十月丁未
頒銅獸符於驃騎車騎府戊申道王靜薨庚午詔曰五
帝異樂三王殊禮皆隨事而有損益因情而立節文仰
惟祭享宗廟瞻敬如在罔極之感情深茲日而禮畢升
路鼓吹發音還入宮門金石振響斯則哀樂同日心事
相違情所不安理實未允宜改茲往式用弘禮教自今
已後享廟日不須備鼓吹殿庭勿設樂懸辛未京師大
索十一月丁亥突厥遣使來朝十二月壬子上柱國右
武侯大將軍魯國公虞慶則以罪伏誅

十八年春正月辛丑詔曰吳越之人往承敝俗所在之

處私造大船因相聚結致有侵害其江南諸州人間有
船長三丈已上悉括入宮二月甲辰幸仁壽宮乙巳以
漢王諒爲行軍元帥水陸三十萬伐高麗三月乙亥以
柱國杜彥爲朔州總管夏四月癸卯以蔣州刺史郭衍
爲洪州總管五月辛亥詔蓄猫鬼蟲毒厥魃野道之家
投於四裔六月景寅下詔黜高麗王高元官爵秋七月
壬申詔以河南八州水免其課役景子詔京官五品已
上總管刺史以志行脩謹清平幹濟二科舉人九月己
丑漢王諒師遇疾疫而旋死者十八九庚寅勅舍客無
公驗者坐及刺史縣令辛卯至自仁壽宮冬十一月甲
戌上親錄囚徒癸未有事於南郊十二月庚子上柱國
夏州總管任城郡公王景以罪伏誅是月自京師至仁
壽宮置行宮十有二所

十九年春正月癸酉大赦天下戊寅大射武德殿宴賜
百官二月己亥晉王諱來朝辛丑以并州總管長史宇
文弼爲朔州總管甲寅幸仁壽宮夏四月丁酉突厥利
可汗內附達頭可汗犯塞遣行軍總管史萬歲擊破之
六月丁酉以豫章王暕爲內史令秋八月癸卯上柱國
尚書左僕射齊國公高頰坐事免辛亥上柱國皖城郡
公張威卒甲寅上柱國城陽郡公李徹卒九月乙丑以

太常卿牛弘爲吏部尚書冬十月甲午以突厥利可汗
爲啓人可汗築大利城處其部落夷子以朔州總管宇
文弼爲代州總管十二月乙未突厥都藍可汗爲部下
所殺丁丑星竇於勃海

二十年春正月辛酉朔上在仁壽宮突厥高麗契丹並
遣使貢方物癸亥以代州總管宇文弼爲吳州總管二
月己巳以上柱國崔弘度爲原州總管丁丑無雲而雷
三月辛卯熙州人李英林反遣行軍總管張衡討平之
夏四月壬戌突厥犯塞以晉王廣爲行軍元帥擊破之
乙亥天有聲如瀉水自南而北六月丁丑秦王俊薨秋

八月老人星見九月丁未至自仁壽宮癸丑吳州總管
楊昇卒冬十月己未太白晝見乙丑皇太子勇及諸子
並廢爲庶人殺柱國太平縣公史萬歲己巳殺左衛大
將軍五原郡公元旻十一月戊子天下地震京師大風
雪以晉王廣爲皇太子十二月戊午詔東宮官屬不得
稱臣於皇太子辛巳詔曰佛法深妙道教虛融咸降大
慈濟度羣品凡在含識皆蒙覆護所以雕鑄靈相圖寫
真形率土瞻仰用申誠敬其五嶽四鎮節宣雲雨江河
淮海浸潤區域並生養萬物利益兆人故建廟立祀以
時恭敬敢有毀壞偷盜佛及天尊像嶽鎮海瀆神形者

以不道論沙門壞佛像道士壞天尊者以惡途論

仁壽元年春正月乙酉朔大赦改元以尚書右僕射楊素爲尚書左僕射納言蘇威爲尚書右僕射丁酉徙河南王昭爲晉王突厥寇恒安遣柱國韓洪擊之官軍敗績以晉王昭爲內史令辛丑詔曰君子立身雖云百行唯誠與孝最爲其首故投主殉節自古稱難殞身王事禮加二等而代俗之徒不達大義至於致命戎旅不入兆域虧孝子之意傷人臣之心興言念此每深愍歎且入廟祭祀並不廢闕何止墳塋獨在其外自今已後戰亡之徒宜入墓域二月乙卯朔日有蝕之辛巳以上柱

國獨孤楷爲原州總管三月壬辰以豫章王暕爲揚州總管夏四月以浙州刺史蘇孝慈爲洪州總管五月己丑突厥男女九萬口來降壬辰驟雨震雷大風拔木宜君湫水移於始平六月癸丑洪州總管蘇孝慈卒乙卯遣十六使巡省風俗乙丑詔曰儒學之道訓教生人識父子君臣之義知尊卑長幼之序升之於朝任之以職故能贊理時務弘益風範朕撫臨天下思弘德教延集學徒崇建庠序開進仕之路佇賢雋之人而國學胄子垂將千數州縣諸生成亦不少徒有名錄空度歲時未有德爲代範才任國用良由設學之理多而未精今宜

簡省明加獎勵於是國子學唯留學生七十人太學四門及州縣學並廢其日頒舍利於諸州七月戊戌改國子爲太學九月癸未以柱國杜彥爲雲州總管十一月己丑有事於南郊壬辰以資州刺史衛玄爲遂州總管

二年春二月辛亥以荊州刺史侯莫陳穎爲桂州總管宗正楊祀爲荊州總管三月己亥幸仁壽宮壬寅以齊州刺史張喬爲潭州總管夏四月庚戌岐雍二州地震秋七月景戌詔內外官各舉所知戊子以原州總管獨孤楷爲益州總管八月己巳皇后獨孤氏崩九月景戌

至自仁壽宮壬辰河南北諸州大水遣工部尚書楊達賑恤之乙未上柱國襄州總管金水郡公周搖卒隴西地震冬十月壬子曲赦益州管內癸丑以工部尚書楊達爲納言閏月甲申詔尚書左僕射楊素與諸術者刊定陰陽舛謬己丑詔曰禮之爲用時義大矣黃琮蒼璧降天地之神粢盛牲食展宗廟之敬正父子君臣之序明婚姻喪紀之節故道德仁義非禮不成安上治人莫善於禮自區宇亂離歷年代王道衰而變風作微言絕而大義乖與代推移其弊日甚至於四時郊祀之節文五服麻葛之隆殺是非異說踳駁殊塗致使聖教凋

訛輕重無准朕祗承天命撫臨生人當洗滌之時屬于
戈之代克定禍亂先運武功剛正彝典日不暇給今四
海乂安五戎勿用理宜弘風訓俗導德齊禮綴往聖之
舊章與先王之茂則尚書左僕射越國公楊素尚書右
僕射邳國公蘇威吏部尚書奇章公牛弘內史侍郎薛
道衡祕書丞許善心內史舍人虞世基著作郎王劭或
任居端揆博達古今或器推令望學綜經史委以裁緝
實允僉議可並脩定五禮壬寅葬獻皇后於太陵十二
月癸巳上柱國益州總管蜀王秀廢爲庶人交州人李
佛子舉兵反遣行軍總管劉方討平之

三年春二月己卯原州總管比陽縣公龐晃卒戊子以
大將軍蔡陽郡公姚辯爲左武侯大將軍夏五月癸卯
詔曰哀哀父母生我劬勞欲報之德昊天罔極但風樹
不靜嚴敬莫追霜露旣降感思空切六月十三日是朕
生日宜令海內爲武元皇帝元明皇后斷屠六月甲午
詔曰禮云至親以菽斷蓋以四時之變易萬物之更始
故聖人象之其有三年加隆爾也但家無二尊母爲厭
降是以父存喪母還服于菽者服之正也豈容菽內而
更小祥然三年之喪而有小祥者禮云菽祭禮也菽而
除喪道也以是之故雖未再菽而天地一變不可不祭

不可不除故有練焉以存喪祭之本然暮喪有練於理未安雖云十一月而練乃無所法象非暮非時豈可除祭而儒者徒擬三年之喪立練禫之節可謂苟存其變而失其本欲漸於奪乃薄於喪致使子則冠練去經黃裏線緣經則布葛在躬麤服未改豈非經哀尚存子情已奪親疎失倫輕重顛倒乃不順人情豈聖人之意也故知先聖之禮廢於人邪三年之喪尚有不行之者至於祥練之節安能不墜者乎禮云父母之喪無貴賤一也而大夫士之喪父母乃貴賤異服然則禮壞樂崩由來漸矣所以晏平仲之斬麤練其老謂之非禮滕文公之服三年其臣咸所不欲蓋由王道既衰諸侯異政將踰越於法度惡禮制之害已乃滅去篇籍自制其宜遂至骨肉之恩輕重從俗無易之道隆殺任情況孔子沒而微言隱秦滅學而經籍焚者乎有漢之興雖求儒雅人皆異說義非一貫又近代亂離唯務兵革其於典禮時所未遑夫禮不從天降不從地出乃人心而已者謂情緣於恩也故恩厚者其禮隆情輕者其禮殺聖人以是稱情立文別親疎貴賤之節自臣子道消上下失序莫大之恩逐情而薄莫重之禮與時而殺此乃服不稱喪容不稱服非所謂聖人緣恩表情制禮之義也然喪

與易也寧在於戚則禮之本也禮有其餘未若於哀則情之實也今十一月而練者非禮之本非情之實由是言之父存喪母不宜有練但依禮十三月而祥中月而禫庶以合聖人之意達孝子之心六月丁卯詔曰日往月來唯天所以運序山鎮川流唯地所以宣氣運序則寒暑無差宣氣則雲雨有作故能成天地之大德育萬物而爲功况一人君子四海睹物欲運獨見致治不藉羣才未之有也是以唐堯欽明命羲和以居岳虞舜叡德升元凱而作相伊尹鼎俎之賡爲殷之阿衡呂望漁釣之夫爲周之尚父此則鳴鶴在陰其子必和風雲之從龍虎賢哲之應聖明君德不回臣道以正故能通天地之和順陰陽之序豈不由元首而有股肱乎自王道衰人風薄居上莫能公道以御物爲下必踵私法以希時上下相蒙君臣義失義失則政乖政乖則人困蓋同德之風難嗣離德之軌易追則任者不休休者不任則衆口鑠金戮辱之禍不測是以行歌避代辭位灌園卷而可懷黜而無愠放逐江湖之上沈赴河海之流所以自潔而不悔者也至於閭閻秀異之士鄉曲博雅之儒言足以佐時行足以勵俗遺棄於草野堙滅而無聞豈勝道哉所以覽古而歎息者也方今區宇一家煙火

萬里百姓乂安四夷賓服豈是人功實乃天意朕惟夙
夜祇懼將所以上嗣明靈是以小心勵已日慎一日以
黎元在念憂兆庶未康以庶政爲懷慮一物失所雖求
傳巖莫見幽人徒想崆峒未聞至道唯恐商歌於長夜
抱關於夷門遠跡犬羊之間屈身僮僕之伍其令州縣
搜揚賢哲皆取明知今古通識治亂究政教之本達禮
樂之源不限多少不得不舉限以三旬咸令進路徵召
將送必須以禮八月壬申上柱國檢校幽州總管落叢
郡公燕榮以罪伏誅九月壬戌置常平官甲子以營州
總管韋冲爲民部尚書十二月癸酉河南諸州水遭飭

言楊達賑恤之

四年春正月景辰大赦甲子幸仁壽宮乙丑詔賞罰支
度事無巨細並付皇太子夏四月乙卯上不豫六月庚
申大赦天下有星入月中數日而退長人見於鴈門秋
七月乙未日青無光八日乃復己亥以太將軍段文振
爲雲州總管甲辰上以疾甚臥於仁壽宮與百寮辭訣
並握手歔歔丁未崩於大寶殿時年六十四遺詔曰嗟
乎自昔晉室播遷天下喪亂四海不一以至周齊戰爭
相尋年將三百故割疆土者非一所稱帝王者非一人
書軌不同生人塗炭上天降鑒爰命於朕用登大位豈

關人力故得撥亂反正偃武脩文天下大同聲教遠被
此又是天意欲寧區夏所以昧旦臨朝不敢逸豫一日
萬幾留心親覽晦明寒暑不憚劬勞匪曰朕日蓋爲百
姓故也王公卿士每日闕庭刺史以下三時朝集何嘗
不罄竭心府誠勅殷勤義乃君臣情兼父子庶藉百寮
智力萬國歡心欲令率土之人永得安樂不謂遘疾彌
留至於大漸此乃人生常分何足言及但四海百姓衣
食不豐教化政刑猶未盡善興言念此唯以留恨朕今
年踰六十不復稱夭但筋力精神一時勞竭如此之事
本非爲身止欲安養百姓所以致此人生子孫誰不愛
念旣爲天下事須割情勇及秀等並懷悖惡旣知無臣
子之心所以廢黜古人有言知臣莫若於君知子莫若
於父若令勇秀得志共治國家必當戮辱徧於公卿酷
毒流於人庶今惡子孫已爲百姓黜屏好子孫足堪負
荷大業此雖朕家事理不容隱前對文武符衛具已論
述皇太子廣地居上嗣仁孝著聞以其行業堪成朕志
但令內外羣官同心戮力以此共治天下朕雖瞑日何
所復恨但國家事大不可限以常禮旣葬公除行之自
昔今宜遵用不勞改定凶禮所須纔令周事務從節儉
不得勞人諸州總管刺史已下宜各率其職不須奔赴

自古哲王因人作法前帝後帝沿革隨時律令格式或
有不便於事者宜依前勅脩改務當政要嗚呼敬之哉
無墜朕命乙卯發喪河間楊柳四株無故黃落旣而花
葉復生八月丁卯梓宮至自仁壽宮景子殯于大興前
殿冬十月己卯合葬於太陵同墳而異穴上性嚴重有
威容外質木而內明敏有大略初得政之始羣情不附
諸子幼弱內有六王之謀外致三方之亂握強兵居重
鎮者皆周之舊臣上推以赤心各展其用不踰暮月克
定二邊未及十年平一四海薄賦斂輕刑罰內脩制度
外撫戎夷每旦聽朝日具忘倦居處服翫務存節儉令
行禁止上下化之開皇仁壽之間丈夫不衣綾綺而無
金玉之飾常服率多布帛裝帶不過以銅鐵骨角而已
雖嗇於財至於賞賜有功亦無所愛恡乘輿四出路逢
上表者則駐馬親自臨問或潛遣行人採聽風俗吏治
得失人間疾苦無不留意嘗遇關中饑遣左右視百姓
所食有得豆屑雜糠而奏之者上流涕以示羣臣深自
咎責爲之撤膳不御酒肉者殆將一暮及東拜太山關
中戶口就食洛陽者道路相屬上勅斥堠不得輒有驅
逼男女參廁於仗衛之間逢扶老携幼者輒引馬避之
慰勉而去至艱險之處見負擔者遽令左右扶助之其

有將士戰沒必加優賞仍令使者就加勞問自強不息
朝夕孜孜人庶殷繁帑藏充實雖未能臻於至治亦足
稱近代之良主然天性沉猜素無學術好爲小數不達
大體故忠臣義士莫得盡心竭辭其草創元勳及有功
諸將誅夷罪退罕有存者又不悅詩書廢除學校唯婦
言是用廢黜諸子逮于暮年持法尤峻喜怒不常過於
殺戮嘗令左右送西域朝貢使出玉門關其所經之
處或受牧宰小物饋遺鸚鵡麋皮馬鞭之屬上聞而大
怒又詣武庫見署中蕪穢不治於是執武庫令及諸受
遺者出開遠門外親自臨決死者數十人又往往潛令
人賂遺令史府史有受者必死無所寬貸議者以此少
之

史臣曰高祖龍德在田奇表見異晦明藏用故知我者
希始以外戚之尊受託孤之任與能之議未爲當時所
許是以周室舊臣咸懷憤惋旣而王謙固三蜀之阻不
踰朞月尉迴舉全齊之衆一戰而亡斯乃非止人謀抑
亦天之所贊也乘茲機運遂遷周鼎于時蠻夷猾夏荆
揚未一劬勞日具經營四方樓船南邁則金陵失險驃
騎北指則單于款塞職方所載並入疆理禹貢所圖咸
受正朔雖晉武之克平吳會漢宣之推亡固存比義論

功不能尚也七德既敷九歌已洽要荒咸暨尉候無警
於是躬節儉平徭賦倉廩實法令行君子咸樂其生小
人各安其業強無陵弱衆不暴寡人物殷阜朝野歡娛
二十年間天下無事區宇之內晏如也考之前王足以
參蹤盛烈但素無術學不能盡下無寬仁之度有刻薄
之資暨乎暮年此風逾扇又雅好符瑞暗於大道建彼
維城權侔京室皆同帝制靡所適從聽哲婦之言惑邪
臣之說溺寵廢嫡託付失所滅父子之道開昆弟之隙
縱其尋斧翦伐本枝墳土未乾子孫繼踵屠戮松檟纔
列天下已非隋有惜哉迹其衰怠之源稽其亂亡之兆
起自高祖成於煬帝所由來遠矣非一朝一夕其不祀
忽諸未爲不幸也

隋書卷二終

隋書卷三

帝紀第三

特進臣魏徵上

皇明朝列大夫國子監祭酒臣方從哲

勅重較刊 皇明朝列大夫國子監祭酒臣吳士元

承直郎國子監司業臣楊道賓等奉 承德郎司業仍加俸一級臣黃 錦等奉

煬帝上

煬皇帝諱廣一名英小字阿慶高祖第二子也母曰文獻獨孤皇后上美姿儀少敏慧高祖及后於諸子中特所鍾愛在周以高祖勳封鴈門郡公開皇元年立為晉王拜柱國并州總管時年十三尋授武衛大將軍進位

上柱國河北道行臺尚書令大將軍如故高祖令項城
公歆安道公才李徹輔導之上好學善屬文沉深嚴重
朝野屬望高祖密令善相者來和徧視諸子和曰晉王
看上雙骨隆起貴不可言既而高祖幸上所居第見樂
器絃多斷絕又有塵埃若不用者以爲不好聲妓善之
上尤自矯飾當時稱爲仁孝嘗觀獵遇雨左右進油衣
上曰士卒皆霑濕我獨本此乎乃令持去六年轉淮南
道行臺尚書令其年徵拜雍州牧內史令八年冬大舉
伐陳以上爲行軍元帥及陳平執陳湘州刺史施文慶
散騎常侍沈客卿市令陽慧朗刑法監徐析尚書都令
史暨慧以其邪佞有害於民斬之右闕下以謝三吳於
是封府庫資財無所取天下稱賢進位大尉賜輅車乘
馬袞冕之服玄珪白璧各一復拜并州總管俄而江南
高智慧等相聚作亂徙上爲揚州總管鎮江都每歲一
朝高祖之祠太山也領武侯大將軍明年歸藩後數載
突厥寇邊復爲行軍元帥出靈武無虜而還及太子勇
廢立上爲皇太子是月當受冊高祖曰吾以大興公成
帝業今上出舍大興縣其夜烈風大雪地震山崩民舍
多壞壓死者百餘口仁壽初奉詔巡撫東南是後高祖
每避暑仁壽宮恒令上監國四年七月高祖崩上卽皇

帝位於仁壽宮八月奉梓宮還京師并州總管漢王諒
舉兵反詔尚書左僕射楊素討平之九月乙巳以備身
將軍崔彭爲左領軍大將軍十一月乙未幸洛陽景申
發丁男數十萬掘塹自龍門東接長平汲郡抵臨清關
度河至浚儀襄城達於上洛以置關防癸丑詔曰乾道
變化陰陽所以消息訟創不同生靈所以順敘若使天
意不變施化何以成四時人爭不易爲政何以蒼萬姓
易不二乎通其變使民不倦變則通通則久有德則可
久有功則可大朕又聞之安安而能遷民用丕變是故
姬邑兩周如武王之意殷人五徙成湯后之業若不因
人順天功業見乎變愛人治國者可不謂歟然雒邑自
古之都王畿之內天地之所合陰陽之所和控以二河
固以四塞水陸通貢賦等故漢祖曰吾行天下多矣唯
見雒陽自古皇王何嘗不留意所不都者蓋有由焉或
以九州未一或以因其府庫作雒之制所以未暇也我
有隋之始便欲創茲懷雒日復一日越暨于今念茲在
茲興言感哽朕肅膺寶曆纂臨萬邦遵而不失心奉先
志今者漢王諒悖逆毒被山東遂使州縣或淪非所此
由關河懸遠兵不赴急加以并州移戶復在河南周遷
殷人意在於此况復南服遐遠東夏殷大因機順動今

也其時羣司百辟僉諧厥議但成周墟墜弗堪葺宇今
可於伊維營建東京便卽設官分職以爲民極也夫宮
室之制本以便生上棟下宇足避風露高臺廣廈豈曰
適形故傳云儉德之共侈惡之大宣尼有云與其不遜
也寧儉豈謂瑤臺瓊室方爲宮殿者乎土堦采椽而非
帝王者乎是知非天下以奉一人乃一人以主天下也
民惟國本本固邦寧百姓足孰與不足今所營構務從
節儉無令雕墻峻宇復起於當今欲使卑宮菲食將貽
於後世有司明爲條格稱朕意焉十二月乙丑以右武
衛將軍來護兒爲右驍衛大將軍戊辰以柱國李景爲

右武衛大將軍以右衛率周羅暉爲右武侯大將軍

大業元年春正月壬辰朔大赦改元立妃蕭氏爲皇后
改豫州爲溱州洛州爲豫州廢諸州總管府丙申立晉
王昭爲皇太子丁酉以上柱國宇文述爲左衛大將軍
上柱國郭衍爲左武衛大將軍延壽公于仲文爲右衛
大將軍己亥以豫章王暕爲豫州牧戊申發八使巡省
風俗下詔曰昔者哲王之治天下也其在愛民乎旣富
而教家給人足故能風淳俗厚遠至邇安治定功成率
由斯道朕嗣膺寶曆撫育黎獻夙夜戰兢若臨川谷雖
則聿遵先緒弗敢失墜永言政術多有缺然况以四海

之遠兆民之衆未獲親臨問其疾苦每慮幽仄莫舉寃
屈不申一物失所乃傷和氣萬方有罪責在朕躬所以
寤寐增歎而夕惕載懷者也今旣布政惟始宜存寬大
可分遣使人巡省方俗宣揚風化薦拔淹滯申達幽枉
孝悌力田給以優復鰥寡孤獨不能自存者量加振濟
義夫節婦旌表門閭高年之老加其版授並依別條賜
以粟帛篤疾之徒給侍丁者雖有侍養之名會無矜贍
之實明加檢校使得存養若有名行顯著操履脩絜及
學業才能一藝可取歲宜訪採將身入朝所在州縣以
禮發遣其有憲政害人不便於時者使還之日具錄奏

聞己酉以吳州總管宇文弼爲刑部尚書二月己卯以
尚書左僕射楊素爲尚書令三月丁未詔尚書令楊素
納言楊達將作大匠宇文愷營建東京徙豫州郭下居
人以實之戊申詔曰聽採輿頌謀及庶民故能審政刑
之得失是知昧旦思治欲使幽枉必達彞倫有章而牧
宰任稱朝委苟爲微幸以求考課虛立殿最不存治實
綱紀於是弗理寃屈所以莫申關河重阻無由自達朕
故建立東京躬親存問今將巡歷淮海觀省風俗眷求
讜言徒繁詞翰而鄉校之內闕爾無聞惟然夕惕用忘
興寢其民下有知州縣官人政治苛刻侵害百姓背公

徇私不便於民者宜聽詣朝堂封奏庶乎四聰以達天下無冤又於阜澗營顯仁宮採海內奇禽異獸草木之類以實園苑徙天下富商大賈數萬家於東京辛亥發河南諸郡男女百餘萬開通濟渠自西苑引穀洛水達于河自板渚引河通于淮庚申遣黃門侍郎王弘上儀同於士澄往江南採木造龍舟鳳艚黃龍赤艦樓船等數萬艘夏四月癸亥大將軍劉方擊林邑破之五月庚戌民部尚書義豐侯韋冲卒六月甲子熒惑入太微秋七月丁酉制戰亡之家給復十年景午滕王綸衛王集帝奪爵徙邊閏七月甲子以尚書令楊素爲太子太師

安德王雄爲太子太傅河間王弘爲太子太保景子詔曰君民建國教學爲先移風易俗必自茲始而言絕義乖多歷年代進德脩業其道寢微漢採坑焚之餘不絕如線晉承板蕩之運掃地將盡自時厥後軍國多虞雖復鬻宇時建示同愛禮函丈或陳殆爲虛器遂使紆青拖紫非以學優製錦操刀類多牆面上陵下替網維靡立雅缺道消實由於此朕纂承洪緒思弘大訓將欲尊師重道用闡厥繇講信脩睦敦獎名教方今宇宙平一文軌攸同十步之內必有芳草四海之中豈無奇秀諸在家及見入學者若有篤志好古耽悅典墳學行優敏

堪膺時務所在採訪具以名聞卽當隨其器能擢以不
次若研精經術未願進仕者可依其藝業深淺門蔭高
卑雖未升朝並量準給祿庶夫恂恂善誘不日成器濟
濟盈朝何遠之有其國子等學亦宜申明舊制教習生
徒具爲課試之法以盡砥礪之道八月壬寅上御龍舟
幸江都以左武衛大將軍郭衍爲前軍右武衛大將軍
李景爲後軍文武官五品已上給樓船九品以上給黃
蔑舳艫相接二百餘里冬十月己丑赦江淮已南揚州
給復五年舊總管內給復三年十一月己未以大將軍
崔仲方爲禮部尚書

二年春正月辛酉東京成賜監督者各有差以大理卿
梁毗爲刑部尚書丁卯遣十使併省州縣二月景戌詔
尚書令楊素吏部尚書牛弘大將軍宇文愷內史侍郎
虞世基禮部侍郎許善心制定輿服始備輦路及五時
副車上常服皮弁十有二珙文官弁服佩玉五品已上
給犢車通幃三公親王加油絡武官平巾幘袴褶三品
已上給爬梨下至胥吏服色皆有差非庶人不得戎服
戊戌置都尉官三月庚午車駕發江都先是太府少卿
何稠太府丞雲定興盛脩儀仗於是課州縣送羽毛百
姓求捕之網羅被水陸禽獸有堪斃毘之用者殆無遺

類至是而成夏四月庚戌上自伊闕陳法駕備千乘萬
騎入於東京辛亥上御端門大赦免天下今年租稅癸
丑以冀州刺史楊文思爲民部尚書五月甲寅金紫光
祿大夫兵部尚書李通坐事免乙卯詔曰旌表先哲式
存饗祀所以優禮賢能顯彰遺愛朕永鑒前脩尚想名
德何嘗不興歎九原屬懷千載其自古已來賢人君子
有能樹聲立德佐世匡時博利殊功有益於人者並宜
營立祠宇以時致祭墳壟之處不得侵踐有司量爲條
式稱朕意焉六月壬子以尚書令太子太師楊素爲司
徒進封豫章王竦爲齊王秋七月癸丑以衛尉卿衛玄
爲工部尚書庚申制百官不得計考增級必有德行功
能灼然顯著者擢之壬戌擢藩邸舊臣鮮于羅等二十
七人官爵有差甲戌皇太子昭薨乙亥上柱國司徒楚
國公楊素薨八月辛卯封皇孫倓爲燕王侗爲越王侑
爲代王九月乙丑立秦孝王俊子浩爲秦王冬十月戊
子以靈州刺史段文振爲兵部尚書十二月庚寅詔曰
前代帝王因時創業君民建國禮尊南面而歷運推移
年世永久丘壟殘毀樵牧相趨塋兆堙蕪封樹莫辨興
言淪滅有愴于懷自古已來帝王陵墓可給隨近十戶
蠲其雜役以供守視

二年春正月癸亥勅并州逾黨已流配而逃亡者所獲之處卽宜斬決。子長星竟天出於東壁二旬而止。是月武陽郡上言河水清二月己丑彗星見於奎掃文昌歷大陵五車北河入太微掃帝坐前後百餘日而止。三月辛亥車駕還京師壬子以大將軍姚辨爲左屯衛將軍癸丑遣羽騎尉朱寬使於流求國乙卯河間王弘薨夏四月庚辰詔曰古者帝王觀風問俗皆所以憂勤兆庶安集遐荒自蕃夷內附未遑親撫山東經亂須加存卹今欲安集河北巡省趙魏所司依式甲申頒律令大赦天下關內給復三年。辰改州爲郡改度量權衡並

依古式改上柱國已下官爲大夫甲午詔曰天下之重非獨治所安帝王之功豈一士之畧自古明君哲后立政經邦何嘗不選賢與能收採幽滯周稱多士漢號得人常想前風載懷欽佇朕負展夙興冕旒待旦引領巖谷寘以周行冀與羣才共康庶績而彙茅寂寞投竿罕至豈美璞韜采未值良工將介石在懷確乎難拔永鑒前哲憮然興歎凡厥在位譬諸股肱若濟巨川義同舟楫豈得保茲寵祿晦爾所知優游卒歲甚非謂也祈大矣之舉善良史以爲至公臧文仲之蔽賢尼父譏其竊位求諸往古非無褒貶宜思進善用匡寡薄夫孝悌有

聞人倫之本德行敦厚立身之基或節義可稱或操履
清絜所以激貪勵俗有益風化強毅正直執憲不撓學
業優敏文才美秀並爲廊廟之用實乃瑚璉之資才堪
將略則拔之以禦侮膂力驍壯則任之以爪牙爰及一
藝可取亦宜採錄衆善畢舉與時無棄以此未治庶幾
非遠文武有職事者五品已上宜依令十科舉人有一
於此不必求備朕當待以不次隨才升擢其見任九品
已上官者不在舉送之限景申車駕北巡狩丁酉以刑
部尚書宇文弼爲禮部尚書戊戌勅百司不得踐暴禾
稼其有須開爲路者有司計地所收卽以近倉酬賜務
從優厚己亥次赤岸澤以太牢祭故太師李穆墓五月
丁巳突厥啓民可汗遣子拓特勒來朝戊午發河北十
餘郡丁男鑿太行山達于并州以通馳道景寅啓民可
汗遣其兄子毗黎伽特勒來朝辛未啓民可汗遣使請
自入塞奉迎輿駕上不許癸酉有星孛于文昌上將星
皆動搖六月辛巳獵於連谷丁亥詔曰聿追孝饗德莫
至焉崇建寢廟禮之大者然則質文異代損益殊時學
滅坑焚經典散逸憲章湮墜廟堂制度師說不同所以
世數多少莫能是正連室異宮亦無準定朕獲奉祖宗
欽承景業永惟嚴配思隆大典於是詢謀在位博訪儒

術咸以爲高祖文皇帝受天明命奄有區夏拯羣飛於四海革凋敝於百王恤獄緩刑生靈皆遂其性輕徭薄賦比屋各安其業恢夷宇宙混壹車書東漸西被無思不服南征北怨俱荷來蘇駕毳乘風歷代所弗至辮髮左衽聲教所罕及莫不厥角關塞頓顙闕庭譯靡絕時書無虛月韜戈偃武天下晏如嘉瑞休徵表裏禔福猗歟偉歟無得而名者也朕又聞之德厚者流光治辨者禮縟是以周之文武漢之高光其典章特立謚號斯重豈非緣情稱述卽崇顯之義乎高祖文皇帝宜別建廟宇以彰巍巍之德仍遵月祭用表蒸蒸之懷有司以時創造務合典制又名位旣殊禮亦異等天子七廟事著前經諸侯二昭義有差降故其以多爲貴王者之禮今可依用貽厥後昆戊子次榆林郡丁酉啓民可汗來朝巳亥吐谷渾高昌並遣使貢方物甲辰上御北樓觀漁于河以宴百寮秋七月辛亥啓民可汗上表請變服襲冠帶詔啓民贊拜不名位在諸侯王上甲寅上於郡城東御大帳其下備儀衛建旌旗宴啓民及其部落三千五百人奏百戲之樂賜啓民及其部落各有差景子殺光祿大夫賀若弼禮部尚書宇文弼太常卿高顯尚書左僕射蘇威坐事免發丁男百餘萬築長城西距榆林

東至紫河一旬而罷死者十五六八月壬午車駕發榆
林乙酉啓民飾廬清道以候乘輿帝幸其帳啓民奉觴
上壽宴賜極厚上謂高麗使者曰歸語爾王當早來朝
見不然者吾與啓民巡彼土矣皇后亦幸義城公主帳
已丑啓民可汗歸蕃癸巳入樓煩關壬寅次太原詔營
晉陽宮九月己未次濟源幸御史大夫張衡宅宴享極
歡已巳至于東都壬申以齊王暕爲河南尹開封府儀
同三司癸酉以民部尚書楊文思爲納言

四年春正月乙巳詔發河北諸郡男女百餘萬開未濟
渠引沁水南達于河北過涿郡庚戌百寮大射於允武

殿丁卯賜城內居民米冬二十石壬申以太府卿元壽爲
內史令鴻臚卿楊玄感爲禮部尚書癸酉以工部尚書
衛玄爲右候衛大將軍大理卿長孫熾爲民部尚書二
月己卯遣司朝謁者崔毅使突厥處羅致汗血馬三月
辛酉以將作大匠宇文愷爲工部尚書壬戌百濟倭赤
土迦邏舍國並遣使貢方物乙丑車駕幸五原因出塞
巡長城景寅遣屯田主事常駿使赤土致羅罽夏四月
景午以離石之汾源臨泉鴈門之秀容爲樓煩郡起汾
陽宮癸丑以河內太守張定和爲左屯衛大將軍乙卯
詔曰突厥意利珍豆啓民可汗率領部落保附關塞遵

奉朝化思改戎俗頻入謁觀屢有陳請以甃牆毳幕事
窮荒陋上棟下宇願同比屋誠心懇切朕之所重宜於
萬壽戍置城造屋其帷帳牀褥已上隨事量給務從優
厚稱朕意焉五月壬申蜀郡獲三足鳥張掖獲玄狐各
一秋七月辛巳發丁男二十餘萬築長城自榆林谷而
東乙未左翊衛大將軍宇文述破吐谷渾於曼頭赤水
八月辛酉親祠恒岳河北道郡守畢集大赦天下車駕
所經郡縣免一年租調九月辛未徵天下鷹師悉集東
京至者萬餘人戊寅彗星出於五車掃文昌至房而滅
辛巳詔免長城役者一年租賦冬十月景午詔曰先師
尼父聖德在躬誕發天縱之姿憲章文武之道命世膺
期蘊茲素王而頽山之歎忽踰於千祀盛德之美不存
於百代永惟懿範宜有優崇可立孔子後爲紹聖侯有
司求其苗裔錄以申上辛亥詔曰昔周王下車首封唐
虞之胤漢帝承曆亦命殷周之後皆所以褒立先代憲
章在昔朕嗣膺景業旁求雅訓有一弘益欽若命典以
爲周兼夏殷文質大備漢有天下車書混一魏晉公襲
風流未遠並宜立後以存繼絕之義有司可求其胄緒
列聞乙卯頒新式於天下

五年春正月景子改東京爲東都癸未詔天下均田戊

子自上東都還京師己丑制民間鐵叉搭鈎積刃之類皆禁絕之丁酉每歲密上屬官景迹二月戊戌次于閔鄉詔祭古帝王陵及開皇功臣墓庚子制魏周宮不得爲蔭辛丑赤土國遣使貢方物戊申車駕至京師景辰宴耆舊四百人於武德殿頒賜各有差己未上御崇德殿之西院愀然不悅顧謂左右曰此先帝之所居實用增感情所未安宜於此院之西別營一殿壬戌制父母聽隨子之官三月己巳車駕西巡河右庚午有司言武功男子史永遵與從父昆弟同居上嘉之賜物一百段米二百石表其門閭乙亥幸扶風舊宅夏四月己亥犬獵於隴西壬寅高昌吐谷渾伊吾並遣使來朝乙巳次狄道党項羌來貢方物癸亥出臨津關渡黃河至西平陳兵講武五月乙亥上大獵於拔延山長圍周亘二千里庚辰入長寧谷壬午度星嶺甲申宴羣臣於金山之上景戌梁浩豐御馬度而橋壞斬朝散大夫黃旦及督役者九人吐谷渾主率衆保覆袁川帝分命內史元壽南屯金山兵部尚書段文振北屯雪山太僕卿楊義臣東屯琵琶峽將軍張壽西屯泥嶺四面圍之渾主伏允以數十騎遁出遣其名王詐稱伏允保車我真山壬辰詔右屯衛大將軍張定和往捕之定和挺身挑戰爲賊

所殺亞將柳武建擊破之斬首數百級甲午其仙頭王
被圍窮蹙幸男女十餘萬口來降六月丁酉遣左光祿
大夫梁默右翊衛將軍李瓊等追渾主皆遇賊死之癸
卯經大斗拔谷山路隘險魚貫而出風霰晦冥與從官
相失士卒凍死者太半景午次張掖辛亥詔諸郡學業
該通才藝優洽膂力驍壯超絕等倫在宮勤奮堪理政
事立性正直不避強禦四科舉人壬子高昌王麴伯雅
來朝伊吾吐屯設等獻西域數千里之地大悅癸丑
置西海河源鄯普且未等四郡景辰上御觀風行殿盛
陳文物奏九部樂設魚龍曼延宴高昌王吐屯設於殿
上以寵異之其蠻夷陪列者三十餘國戊午大赦天下
開皇已來流配悉放還鄉晉陽逆黨不在此例隴右諸
郡給復一年行經之所給復二年秋七月丁卯置馬牧
於青海渚中以求龍種無效而止九月癸未車駕入長
安冬十月癸亥詔曰優德尚齒載之典訓尊事乞言義
彰膠序鬻熊爲師取非筋力方叔元老克壯其猷朕永
言稽古用求至治是以龐眉黃髮更令收敘務簡秩優
無虧藥膳庶等臥治佇其弘益今歲耆老赴集者可於
近郡處置年七十以上疾患沉滯不堪居職卽給賜帛
送還本郡其官至七品已上者量給廩以終厥身十一

月景子車駕幸東都

六年春正月癸亥朔旦有盜數十人皆素冠練衣焚香持華自稱彌勒佛入自建國門監門者皆稽首既而奪衛士仗將爲亂齊王暕遇而斬之於是都下大索與相連坐者千餘家丁丑角抵大戲於端門街天下奇伎異藝畢集終月而罷帝數微服往觀之己丑倭國遣使貢方物二月乙巳武貴郎將陳稜朝請大夫張鎮州擊流求破之獻俘萬七千口頒賜百官乙卯詔曰夫帝圖草創王業艱難成仗股肱叶同心德用能拯厥頽運克膺大寶然後疇庸茂賞開國承家誓以山河傳之不朽近

代喪亂四海未一茅土妄假名實相乖歷茲永久莫能懲革皇運之初百度伊始猶循舊貫未暇改作今天下交泰文軌攸同宜率遵先典永垂大訓自今已後唯有功勳乃得賜封仍令子孫承襲景辰改封安德王雄爲觀王河間王子慶爲郇王庚申徵魏齊周陳樂人悉配太常三月癸亥幸江都宮甲子以鴻臚卿史祥爲左驍衛大將軍夏四月丁未宴江淮已南父老頒賜各有差六月辛卯室韋赤土並遣使貢方物壬辰鴈門賊帥尉文通聚衆三千保於莫壁谷遣鷹揚伯泉擊破之甲寅制江都太守秩同京尹冬十月壬申刑部尚書梁毗

卒壬子民部尚書銀青光祿大夫長孫熾卒十二月巳未左光祿大夫吏部尚書牛弘卒辛酉朱崖人王萬昌舉兵作亂遣隴西太守韓洪討平之

七年春正月壬寅左武衛大將軍光祿大夫真定侯郭衍卒二月巳未上升鈞臺臨楊子津大宴百寮頒賜各有差庚申百濟遣使朝貢乙亥上自江都御龍舟入通濟渠遂幸于涿郡壬午詔曰武有七德先之以安民政有六本興之以教義高麗高元虧失藩禮將欲闕罪遼左挾宣勝略雖懷伐國仍事省方今往涿郡巡撫民俗其河北諸郡及山西山東年九十已上者版授太守八

十者授縣令二月丁亥右光祿大夫左屯衛大將軍姚辯卒夏四月庚午至涿郡之臨朔宮五月戊子以武威太守樊子蓋爲民部尚書秋大水山東河南漂沒三十餘郡民相賣爲奴婢冬十月乙卯底柱山崩偃河逆流數十里戊午以東平太守吐萬緒爲左屯衛大將軍十二月巳未西面突厥處羅多利可汗來朝上大悅接以殊禮于時遼東戰士及餽運者填咽於道晝夜不絕苦役者始爲羣盜甲子勅都尉鷹揚與郡縣相知追捕隨獲斬決之

隋書卷三終

隋書卷四

帝紀第四

特進臣魏徵上

皇明朝列大夫國子監祭酒臣方從哲
承直郎國子監司業臣楊道廣等奉
 勅重較刊
 皇明朝列大夫國子監祭酒臣吳士元
承德郎司業仍加俸一級臣黃錦等奉
 旨重修

煬帝下

八年春正月辛巳大軍集于涿郡以兵部尚書段文振
 為左候衛大將軍壬午下詔曰天地大德降繁霜於秋
 令聖哲至仁著甲兵於刑典故知造化之有肅殺義在
 無私帝王之用干戈蓋非獲已版泉丹浦莫匪龔行取

亂覆昏咸由順動况乎甘野誓師夏開承大禹之業商
郊問罪周發成文王之志永監前載屬當朕躬粵我有
隋誕膺靈命兼三才而建極一六合而為家提封所漸
細柳盤桃之外聲教爰暨紫舌黃枝之域遠至邇安罔
不和會功成治定於是乎在而高麗小醜迷昏不恭崇
聚勃碣之間荐食遼穢之境雖復漢魏誅戮巢窟暫傾
亂離多阻種落還集萃州藪於往代播實繁以迄今睠
彼華壤翦為夷類歷年永久惡稔既盈天道禍淫亡徵
已兆亂常敗德非可勝圖掩厯懷姦惟日不足移告之
嚴未嘗面受朝覲之禮莫肯躬親誘納亡叛不知紀極
充斥邊垂亟勞烽候關柝以之不靜生人為之廢業在
昔薄伐已漏天網既緩前禽之戮未即後服之誅曾不
懷恩翻為長惡乃兼契丹之黨虔劉海戍習靺鞨之服
侵軼遼西又青丘之表咸脩職貢碧海之濱同稟正朔
遂復效攘琛賚過絕往來虐及弗辜誠而遇禍輜軒奉
使爰暨海東旌節所次途經藩境而擁塞道路拒絕王
人無事君之心豈為臣之禮此而可忍孰不可容且法
令苛酷賦歛煩重強臣豪族咸執國鈞朋黨比周以之
成俗賄貨如市冤枉莫伸重以仍歲災凶比屋饑饉兵
戈不息徭役無期力竭轉輸身填溝壑百姓愁苦爰誰

適從境內哀惶不勝其弊迴首面內各懷性命之圖黃
髮稚齒咸興酷毒之歎省俗觀風爰屆幽朔弔人問罪
無俟再駕於是親總六師用申九伐拯厥陪危協從天
意殄茲逋穢克嗣先謨今宜授律啓行分麾屈路掩勃
解而雷震歷夫餘以電掃比戈按甲誓旅而後行先令
五申必勝而後戰左第一軍可鏤方道第二軍可長岑
道第三軍可海冥道第四軍可蓋馬道第五軍可建安
道第六軍可南蘇道第七軍可遼東道第八軍可玄菟
道第九軍可扶餘道第十軍可朝鮮道第十一軍可沃
沮道第十二軍可樂浪道右第一軍可黏蟬道第二軍
可含資道第三軍可渾彌道第四軍可臨屯道第五軍
可候城道第六軍可提奚道第七軍可踏頓道第八軍
可肅慎道第九軍可碣石道第十軍可東曉道第十一
軍可帶方道第十二軍可襄平道凡此衆軍先奉廟略
駱驛引途總集平壤莫非如豺如貔之勇百戰百勝之
雄顧盼則山岳傾頽叱吒則風雲騰鬱心德攸同爪牙
斯在朕躬馭元戎爲其節度涉遼而東循海之右解倒
懸於遐裔問疾苦於遺黎其外輕齎遊闕隨機赴響卷
甲銜枚出其不意又滄海道軍舟艦千里高颿電逝巨
艦雲飛橫斷沮江逕造平壤島嶼之望斯絕坎井之路

已窮其餘被髮左衽之人控弦待發微盧彭濮之旅不
謀同辭杖順臨逆人百其勇以此衆戰勢等摧枯然則
王者之師義存止殺聖人之教必也勝殘天罰有罪本
在元惡人之多僻脅從罔治若高元泥首轅門自歸司
寇卽宜解縛焚覲弘之以恩其餘臣人歸朝奉順咸加
慰撫各安生業隨才任用無隔夷夏營壘所次務在整
肅芻蕘有禁秋毫勿犯布以恩宥喻以禍福若其同惡
相濟抗拒官軍國有常刑俾無遺類明加曉示稱朕意
焉總一百一十三萬三千八百號二百萬其餽運者倍
之癸未第一軍發終四十日引師乃盡旌旗亘千里近

古出師之盛未之有也乙未以右候衛大將軍衛玄爲
刑部尚書甲辰內史令元壽卒二月甲寅詔曰朕觀風
燕裔問罪遼濱文武叶力爪牙思奮莫不執銳勤王捨
家從役罕蓄倉廩之資兼損播殖之務朕所以夕惕愀
然慮其匱乏雖復素飽之衆情在忘私悅使之人宜從
其厚諸行從一品以下飲飛募人以上家口郡縣宜數
存問若有糧食乏少皆宜賑給或雖有田疇貧弱不能
自耕種可於多丁富室勸課相助使夫居者有斂積之
豐行役無顧後之慮壬戌司空京兆尹光祿大夫觀王
雄薨三月辛卯兵部尚書左候衛大將軍段文振卒癸

已上御師甲午臨戎于遼水橋戊戌大軍爲賊所拒不
果濟右屯衛大將軍左光祿大夫麥鐵杖武賁郎將錢
士雄孟金义等皆死之甲午車駕度遼大戰于東岸擊
賊破之進圍遼東乙未大頓見二大鳥高丈餘皜身朱
足遊泳自若上異之命工圖寫并立銘頌五月壬午納
言楊達卒于時諸將各奉旨不敢越機旣而高麗各城
守攻之不下六月己未幸遼東責怒諸將止城西數里
御六合城七月壬寅宇文述等敗績于薩水右屯衛將
軍薛世雄死之九軍並陷將帥奔還亡者二千餘騎癸
卯班師九月庚辰上至東都己丑詔曰軍國異容文武

殊用匡危拯難則霸德攸興化人成俗則王道斯貴時
方撥亂屠販可以登朝世屬隆平經術然後升仕豐都
爰肇儒服無預于周行建武之朝功臣不參于吏職自
三方未一四海交爭不違文教唯尚武功設官分職罕
以才授班朝治人乃由勳叙莫非拔足行陣出自勇夫
敦學之道旣所不習政事之方故亦無取是非暗于在
已威福專於下吏貪冒貨賄不知紀極蠹政害民實由
於此自今已後諸授勳官者並不得回授文武職事庶
遵彼更張取類於調瑟求諸名製不傷于美錦若吏部
輒擬用者御史卽宜糾彈冬十月甲寅工部尚書宇文

愷卒十一月巳卯以宗女華容公主嫁于高昌王辛巳
光祿大夫韓壽卒甲申敗將宇文述于仲文等並除名
爲民斬尚書右丞劉士龍以謝天下是歲大旱疫人多
死山東尤甚密詔江淮南諸郡閱視民間童女姿質端
麗者每歲貢之

九年春正月丁丑徵天下兵募民爲驍果集于涿郡壬
午賊帥杜彥冰王潤等陷平原郡大掠而去辛卯置折
衝果毅武勇雄武等郎將官以領驍果乙未平原李德
逸聚衆數萬稱阿舅賊劫掠山東靈武白榆妄稱奴賊
劫掠牧馬北連突厥隴右多被其患遣將軍范貴討之

連年不能剋戊戌大赦巳亥遣代王侑刑部尚書衛玄
鎮京師辛丑以右驍騎將軍李渾爲右驍衛大將軍二
月巳未濟北人韓進洛聚衆數萬爲羣盜壬午復宇文
述等官爵又徵兵討高麗三月景子濟陰人孟海公起
兵爲盜衆至數萬丁丑發丁男十萬城大興戊寅幸遼
東以越王侗民部尚書樊子蓋留守東都庚子北海人
郭方頂聚徒爲盜自號盧公衆至三萬攻陷郡城大掠
而去夏四月庚午車駕度遼壬申遣宇文述楊義臣趣
平壤五月丁丑熒惑入南斗巳卯濟北人甄寶車聚衆
萬餘寇掠城邑六月乙巳禮部尚書楊玄感反於黎陽

景辰玄感逼東都河南贊務裴弘策拒之反爲賊所敗
戊辰兵部侍郎斛斯政奔于高麗庚午上班師高麗犯
後軍勅右武衛大將軍李景爲後拒遣左翊衛大將軍
宇文述左僕衛將軍屈突通等馳傳發兵以討玄感秋
七月己卯今所在發人城縣府驛癸未餘杭人劉元進
舉兵反衆至數萬八月壬寅左翊衛大將軍宇文述等
破楊玄感於閩鄉斬之餘黨悉平癸卯吳人朱燮晉陵
人管崇擁衆十萬餘自稱將軍寇江左甲辰制驍果之
家蠲免賦役丁未詔郡縣城去道過五里已上者徙就
之戊申制盜賊籍沒其家乙卯賊帥陳瑱等衆三萬攻

陷信安郡辛酉司農卿光祿大夫葛國公趙元淑以罪
伏誅九月己卯濟陰人吳海流東海人彭孝才並舉兵
爲盜衆數萬庚辰賊帥梁慧尚率衆四萬陷蒼梧郡甲
午車駕次上谷以供費不給上大怒免太守虞荷等官
丁酉東陽人李三兒向但子舉兵作亂衆至萬餘閏月
己巳幸博陵庚午上謂侍臣曰朕昔從先朝周旋於此
年甫八歲日月不居倏經三紀追惟平昔不可復希言
未卒流涕嗚咽侍衛者皆泣下沾襟冬十月丁丑賊帥
呂明星率衆數千圍東郡武賁郎將費青奴擊斬之乙
酉詔曰博陵昔爲定州地居衝要先皇歷試所基王化

斯遠故以道冠幽風義高姚邑朕巡撫氓庶爰屆茲邦
瞻望郊廛緬懷敬止思所以宣播德澤覃被下人崇紀
顯號式光令緒可改博陵爲高陽郡授境內死罪已下
給復一年於是召高祖時故吏皆量材授職壬辰以納
言蘇威爲開府儀同三司朱燮管崇推劉元進爲天子
遣將軍吐萬緒魚俱羅討之連年不能剋齊人孟讓王
薄等衆十餘萬據長白山攻剽諸郡清河賊張金稱衆
數萬渤海賊帥格謙自號燕王孫宣雅自號齊王衆各
十萬山東苦之丁亥以右候衛將軍郭榮爲右候衛大
將軍十一月己酉右候衛將軍馮孝慈討張金稱於清
河反爲所敗孝慈死之十二月甲申車裂玄感弟朝請大
夫積善及黨與十餘人仍焚而揚之丁亥扶風人向海
明舉兵作亂稱皇帝建元白鳥遣太僕卿楊義臣擊破
之

十年春正月甲寅以宗女爲信義公主嫁於突厥曷娑
那可汗二月辛未詔百寮講伐高麗數日無敢言者戊
子詔曰竭力王役致身戎事成由徇義莫匪勤誠委命
草澤棄骸原野興言念之每懷愍惻往年出車問罪將
屈遼濱廟算勝略具有進止而諒愔凶罔識成敗高頰
復很本無智謀臨三軍猶兒戲視人命如草芥不遵成

規坐貽撓退遂令死亡者衆不及埋藏今宜遣使人分
道收葬設祭於遼西郡立道場一所恩加泉壤庶弭窮
魂之寃澤及枯骨用弘仁者之惠辛卯詔曰黃帝五十
二戰成湯二十七征方乃德施諸侯令行天下盧芳小
盜漢祖尚且親戎隗囂餘燼光武猶自登隴豈不欲除
暴止戈勞而後逸者哉朕纂成寶業君臨天下日月所
照風雨所沾孰非我臣獨隔聲教蕞爾高麗僻居荒表
鴟張狼噬侮慢不恭抄竊我邊陲侵軼我城鎮是以去
歲出軍問罪遼碣殪長蛇於玄菟戮封豕於襄平扶餘
衆軍風馳電逝追奔逐北徑踰沮水滄海舟楫衝賊腹
心焚其城郭汗其宮室高元伏鎖泥首送款軍門尋請
入朝歸罪司寇朕以許其改過乃詔班師而長惡靡俊
宴安鳩毒此而可忍孰不可容便可分命六師百道俱
進朕當親執武節臨御諸軍秣馬丸都觀兵遼水順天
誅於海外救窮民於倒懸征伐以正之明德以誅之止
除元惡餘無所問若有識存亡之分悟安危之機翻然
北首自求多福必其同惡相濟抗拒王師若火燎原刑
茲無赦有司便宜宣布咸使知聞丁酉扶風人唐弼舉
兵反衆十萬推李弘爲天子自稱唐王三月壬子行幸
涿郡癸亥次臨渝宮親御戎服禡祭黃帝斬叛軍者以

曩鼓夏四月辛未彭城賊張大彪聚眾數萬保懸薄山
 為盜遣榆林太守董純擊破斬之甲午車駕次北平五
 月庚子詔舉郡孝悌廉潔各十人壬寅賊帥宋世謨陷
 琅邪郡庚申延安人劉迦論舉兵反自稱皇王建元大
 世六月辛未賊帥鄭文雅林寶護等眾三萬陷建安郡
 太守楊景祥死之秋七月癸丑車駕次懷遠鎮乙卯曹
 國遣使貢方物甲子高麗遣使請降囚送斛斯政上大
 悅八月己巳班師庚午右衛大將軍左光祿大夫鄭榮
 卒冬十月丁卯上至東都已丑還京師十一月景申支
 解斛斯政於金光門外乙巳有事於南郊己酉賊帥司

馬長安破長平郡乙卯離石胡劉苗王舉兵反自稱天
 子以其第六兒為永安王眾至數萬將軍潘長文討之
 不能剋是月賊帥王德仁擁眾數萬保林慮山為盜十
 二月壬申上如東都其日大赦天下戊子入東都庚寅
 賊帥孟讓眾十餘萬據都梁宮遣江都郡丞王世充擊
 破之盡虜其眾

十一年春正月甲午朔大宴百寮突厥新羅靺鞨畢大
 辭訶咄傳越烏那曷波臘吐火羅俱慮建忽論靺鞨訶
 多沛汗龜茲疎勒于闐安國曹國何國穆國畢衣密失
 范延伽折契丹等國並遣使朝貢戊戌武賁郎將高建

毗破賊帥顏宣政於齊郡虜男女數千口乙卯大會蠻夷設魚龍曼延之樂頒賜各有差二月戊辰賊帥揚緒率衆萬餘攻北平滑公李景破斬之庚午詔曰設險守國著自前經重門禦暴事彰往策所以宅土寧邦禁邪固本而近代戰爭居人散逸田疇無伍邪郭不脩遂使遊惰實繁寇歎未息今天下平一海內晏如宜令人悉城居田隨近給使強弱相容力役兼濟穿窬無所厝其姦宄萑蒲不得聚其逋逃有司具爲事條務令得所景子土谷人王須拔反自稱漫天王國號燕賊帥魏刁兒自稱歷山飛衆各十餘萬北連突厥南寇趙五月丁酉殺右驍衛大將軍光祿大夫郟公李渾將作監光祿大夫李敏並族滅其家癸卯賊帥司馬長安破西河郡已酉幸太原避暑汾陽宮秋七月己亥淮南人張起緒舉兵爲盜衆至三萬辛丑光祿大夫右禦衛大將軍張壽率八月乙丑巡北塞戊辰突厥始畢可汗率騎數十萬謀襲乘輿義成公主遣使告變壬申車駕馳幸鴈門癸酉突厥圍城官軍頻戰不利上大懼欲幸精騎潰圍而出民部尚書樊子蓋固諫乃止齊王暕以後軍保于崞縣甲申詔天下諸郡募兵於是守令各來赴難九月甲辰突厥解圍而去丁未曲赦太原鴈門郡死罪已下

冬十月壬戌上至于東都丁卯彭城人魏騏驎聚眾萬餘爲盜寇魯郡壬申賊帥盧明月聚眾十餘萬寇陳汝間東海賊帥李子通擁眾度淮自號楚王建元闕政寇江都十二月乙卯賊帥王須拔破高陽郡十二月戊寅有大流星如斛墜明月營破其衝車庚辰詔民部尚書樊子蓋發關中兵討絳郡賊敬盤陀柴保昌等經年不能剋譙郡人朱粲擁眾數十萬寇荆襄僭稱楚帝建元昌達漢南諸郡多爲所陷焉

十二年春正月甲午鴈門人翟松柏起兵於靈丘眾至數萬轉攻傍縣二月己未真臘國遣使貢方物甲子夜有二大鳥似鷓鴣飛入大業殿止于御幄至明而去癸亥東海賊盧公暹率眾萬餘保于蒼山夏四月丁巳顯陽門災癸亥魏刀兒所部將甄翟兒復號歷山飛眾十萬轉寇太原將軍潘長文討之反爲所敗長文死之五月景戌朔日有蝕之既癸巳大流星隕于吳郡爲石壬午上於景華宮徵求螢火得數斛夜出遊山放之光徧巖谷秋七月壬戌民部尚書光祿大夫齊北公樊子蓋卒甲子幸江都宮以越王侗光祿大夫段達太府卿元文都檢校民部尚書韋津右武衛將軍皇甫無逸右司郎盧楚等總留後事奉信郎崔民象以盜賊充斥於建國

門上表諫不宜巡幸上大怒先解其頤乃斬之戊辰馮
翊人孫華自號總管舉兵爲盜高涼通守洗瑤徹舉兵
作亂嶺南溪洞多應之己巳熒惑守羽林月餘乃退車
駕次汜水奉信郎王愛仁以盜賊口盛諫上請還西京
上怒斬之而行八月乙巳賊帥趙萬海衆數十萬自恒
山寇高陽壬子有大流星如斗出王良閣道聲如墮牆
癸丑大流星如甕出羽林九月丁酉東海人杜伏威揚
州沈覓敵等作亂衆至數萬右禦衛將軍陳稜擊破之
戊午有二枉矢出北斗魁委曲蛇形注於南斗壬戌安
定人荔非世雄殺臨涇令舉兵作亂自號將軍冬十月

己丑開府儀同三司左翊衛大將軍光祿大夫許公宇文
述薨十二月癸未鄱陽賊操天成舉兵反自號元興
王建元始興攻陷豫章郡乙酉以右翊衛大將軍來護
兒爲開府儀同三司行左翊衛大將軍壬辰鄱陽人林
士弘自稱皇帝國號楚建元太平攻陷九江廬陵郡唐
公破甄翟兒於西河虜男女數千口

十三年春正月壬子齊郡賊杜伏威率衆度淮攻陷歷
陽郡景辰勃海賊竇建德設壇於河間之樂壽自稱長
樂王建元丁丑辛巳賊帥徐圓朗率衆數千破東平郡
弘化人到介成聚衆萬餘人爲盜傍郡苦之二月壬午

朔方人梁師都殺郡丞唐世宗據郡反自稱大丞相遣
銀青光祿大夫張世隆擊之反爲所敗戊子賊帥王子
英破上谷郡己丑馬邑校尉劉武周殺太守王仁恭舉
兵作亂北連突厥自稱定楊可汗庚寅賊帥李密翟讓
等陷興洛倉越王侗遣武賁郎將劉長恭允祿少卿房
賁擊之反爲所敗死者十五六庚子李密自號魏公稱
元年開倉以振羣盜衆至數十萬河南諸郡相繼皆陷
焉壬寅劉武周破武賁郎將王智辯于桑乾鎮智辯死
之三月戊午廬江人張子路舉兵反遣右禦衛將軍陳
稜討平之丁丑賊帥李通德衆十萬寇廬江左屯衛將
軍張鎮州擊破之夏四月癸未金城校尉薛舉率衆反
自稱西秦霸王建元秦興攻陷隴右諸郡己丑賊帥孟
讓夜入東都外郭燒豐都市而去癸巳李密陷迴洛東
倉丁酉賊帥房憲伯陷汝陰郡是月光祿大夫裴仁基
淮陽太守趙佗等並以衆叛歸李密五月辛酉夜有流
星如甕墜於江都甲子唐公起義師於太原景寅突厥
數千寇太原唐公擊破之秋七月壬子熒惑守積屍景
辰武威人李軌舉兵反攻陷河西諸郡自稱涼王建元
安樂八月辛巳唐公破武牙郎將宋老生於霍邑斬之
九月己丑帝括江都人女寡婦以配從兵是月武陽郡

承元寶藏以郡叛歸李密與賊帥李文相攻陷黎陽倉
彗星見於營室冬十月丁亥太原楊世洛聚眾萬餘人
寇掠城邑景申羅今蕭銑以縣反鄱陽人董景珍以郡
反迎銑於羅縣號爲梁王攻陷傍郡戊戌武賁郎將高
毗敗濟北郡賊甄寶車於嶮山十一月景辰唐公入京
師辛酉遙尊帝爲太上皇立代王侑爲帝改元義寧上
起宮丹陽將遜于江左有烏鵲來巢幄帳驅不能止熒
惑犯太微有石自江浮入于揚子日光四散如流血上
甚惡之

二年三月右屯衛將軍宇文化及武賁郎將司馬德戡

元禮監門直閣裴虔通將作少監宇文智及武勇郎將
趙行樞鷹揚郎將孟景內史舍人元敏符璽郎李覆牛
芳裕千牛左右李孝本弟孝質直長許弘仁薛世良城
門郎唐奉義醫正張愷等以驍果作亂入犯宮闈上崩
于溫室時年五十蕭后令宮人撤牀簀爲棺以埋之化
及發後右禦衛將軍陳稜奉梓宮於成象殿葬吳公臺
下發歛之始容貌若生衆咸異之大唐平江南之後改
葬雷塘初上自以藩王次不當立每矯情飾行以釣虛
名陰有奪宗之計時高祖雅信文獻皇后而性忌妾媵
關太子勇內多嬖幸以此失愛帝後庭有子皆不育之

示無私寵取媚於后大臣用事者傾心與交中使至第
無貴賤皆曲承顏色申以厚禮婢僕往來者無不稱其
仁孝又常私人宮掖密謀於獻后楊素等因機構扇遂成
廢立自高祖大漸暨諒闇之中丞滯無度山陵始就卽
事巡遊以天下承平日久士馬全盛慨然慕秦皇漢武
之事乃盛治宮室窮極侈靡召募行人分使絕域諸蕃
至者厚加禮賜有不恭命以兵擊之盛興屯田於玉門
柳城之外課天下富戶益市武馬匹直十餘萬富強坐
是凍餒者十家而九帝性多詭譎所幸之處不欲人知
每之一所輒數道置頓四海珍羞殊味水陸必備焉求
二帝者無遠不至郡縣官人競爲獻食豐厚者進擢踈儉
者獲罪姦吏侵漁內外虛竭頭會箕歛人不聊生于時
軍國多務日不暇給帝方驕怠惡聞政事冤屈不治奏
請罕決又猜忌臣下無所專任朝臣有不合意者必構
其罪而族滅之故高頰賀若弼先皇心膂參謀帷幄張
衡李金才藩邸惟舊績著經綸或惡其直道或忿其正
議求其無形之罪加以刎頸之誅其餘事君盡禮蹇蹇
匪躬無辜無罪橫受夷戮者不可勝紀政刑弛紊賄貨
公行莫敢正言道路以目六軍不息百役繁興行者不
歸居者失業人饑相食邑落爲墟上不之恤也東西遊

幸靡有定居每以供費不給逆收數年之賦所至唯與後宮流連耽酒惟日不足招迎媵媼朝夕共肆醜言又引少年令與宮人穢亂不軌不遜以爲娛樂區宇之內盜賊蜂起劫掠從官屠陷城邑近臣互相掩蔽隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力必不加賞百姓無辜咸受屠戮黎庶憤怨天下土崩至於就擒而猶未之寤也

史臣曰煬帝爰在弱齡早有令聞南平吳會北却匈奴昆弟之中獨著聲績於是矯情飾貌肆厥姦回故得獻后鍾心文皇革慮天方肇亂遂登儲兩踐峻極之崇基承丕顯之休命地廣三代威振八紘單于頓顙越裳重譯赤仄之泉流溢于都內紅腐之衆委積於塞下負其富強之資思逞無厭之欲狹殷周之制度尚秦漢之規摹恃才矜已傲狠明德內懷險躁外示凝簡盛冠服以飾其姦除諫官以掩其過滯荒無度法令滋章教絕四維刑參立電鋤誅骨肉屠勦忠良受賞者莫見其功爲戮者不知其罪驕怒之兵屢動土木之功不息頻出朔方三駕遼左旌旗萬里徵稅百端猾吏侵漁人不堪命乃急令暴條以擾之嚴刑峻法以臨之甲兵威武以董

之自是海內騷然無聊生矣俄而玄感臺黎陽之亂匈奴有鴈門之圍天子方棄中土遠之楊越姦宄乘豐強弱相陵關梁閉而不通皇輿往而不反加以師旅因之以饑饉流離道路轉死溝壑十八九焉於是相聚萑蒲蝟毛而起大則跨州連郡稱帝稱王小則千百爲羣攻城剽邑流血成川澤死人如亂麻炊者不及析骸食者不遑易子茫茫九土並爲麋鹿之場悽悽黔黎俱充蛇豕之餌四方萬里簡書相續猶謂鼠竊狗盜不足爲虞上下相蒙莫肯念亂振蟬蛸之羽窮長夜之樂土崩魚爛貫盈惡稔普天之下莫匪仇讎左右之人皆爲敵國終然不悟同彼望夷遂以萬乘之尊死於一夫之手億兆靡感恩之士九牧無勤王之師子弟同就誅夷骸骨棄而莫掩社稷顛隕本枝殄絕自肇有書契以迄于茲宇宙崩離生靈塗炭喪身滅國未有若斯之甚也書曰天作孽猶可違自作孽不可追傳曰吉凶由人禍不妄作又曰兵猶火也不戢將自焚觀隋室之存亡斯言信而有徵矣

隋書卷四終

隋書卷五

帝紀第五

特進臣魏徵上

皇明朝列大夫國子監祭酒臣方從哲

承直郎國子監司業臣楊道賓等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

恭帝

恭皇帝諱侑元德太子之子也母曰韋妃性聰敏有氣
度大業三年立為陳王後數載徙為代王邑萬戶及煬
帝親征遼東令於京師總留事十一年從幸晉陽拜太
原太守尋鎮京師義兵入長安尊煬帝為太上皇奉帝

纂業

義寧元年十一月壬戌上卽皇帝位於大興殿詔曰王道喪亂天步不康古往今來代有其事屬之於朕逢此百罹彼蒼者天胡寧斯忍襁褓之歲夙遭憫凶孺子之辰太上播越興言感動實疚于懷太尉唐公膺期作宰時稱舟楫大拯橫流糾合義兵翼戴皇室與國休戚再匡區夏爰奉明詔弼予幼冲顯命光臨天威咫尺對揚尊號悼心失圖一人在遠三讓不遂僣俛南面厝身無所苟利社稷莫敢或違俯從羣議奉遵聖旨可大赦天下改大業十三年爲義寧元年十一月十六日昧爽以

前大辟罪已下皆赦除之常赦所不免者不在赦限甲子以光祿大夫大將軍太尉唐公爲假黃鉞使持節大都督內外諸軍事尚書令大丞相進封唐王景寅詔曰朕惟孺子未出深宮太上遠巡追蹤穆滿時逢多難委當尊極辭不獲免恭已臨朝若涉大川罔知所濟撫躬永歎憂心孔棘民之情僞曾未之聞王業艱難載云其易賴股肱戮力上宰賢良匡佐中人輔其不逮軍國機務事無大小文武設官位無貴賤憲章賞罰咸歸相府庶績其凝責成斯屬逃聽前史茲爲典故因循仍舊非曰徒言所存至公無爲讓德已已以唐王子隴西公建

成爲唐國世子敦煌公爲京兆尹改封秦公元吉爲齊
公食邑各萬戶太原置鎮北府乙亥張掖康老和舉兵
反十二月癸未薛舉自稱天子寇扶風秦公爲元帥擊
破之丁亥桂陽人曹武微舉兵反建元通聖丁酉義師
擒驍衛大將軍屈突通於閩鄉虜其衆數萬乙巳賊帥
張善安陷廬江郡

二年春正月丁未詔唐王劔履上殿入朝不趨贊拜不
名加前後羽葆鼓吹壬戌將軍王世充爲李密所敗河
內通守孟善誼武貴郎將王辯楊威劉長恭梁德董智
通皆死之庚戌河陽郡尉獨孤武都降於李密三月景

辰右屯衛將軍宇文化及殺太上皇於江都宮右禦衛
將軍獨孤盛死之齊王暕趙王杲燕王倓光祿大夫開
府儀同三司行右翊衛大將軍宇文協金紫光祿大夫
內史侍郎虞世基銀青光祿大夫御史大夫裴蘊通議
大夫行給事郎許善心皆遇害化及立秦王浩爲帝自
稱大丞相朝士文武皆受其官爵光祿大夫宿公麥才
折衝郎將朝請大夫沈光同謀討賊夜襲化及營反爲
所害戊辰詔唐王備九錫之禮加璽紱遠遊冠綠綬綬
位在諸侯王上唐國置丞相已下一依舊式五月乙巳
朔詔唐王冕十有二旒建天子旌旗出警入蹕金根車

駕備五時副車置旄頭雲罕車舞八佾設鍾虞宮懸王
后王子王女爵命之號一遵舊典戊午詔曰天禍隋國
大行太上皇遇盜江都酷甚望夷豐深驪北憫予小子
奄逮丕魯哀號承感心情靡潰仰惟荼毒仇復靡申形
影相弔罔知啓處相國唐王膺期命世扶危拯溺自北
徂南東征西怨總九合於一匡決百勝於千里糾率夷
夏大庇氓黎保乂朕躬繫王是賴德侔造化功格蒼旻
兆庶歸心曆數斯在屈爲人臣載違天命在昔虞夏揖
讓相推苟非重華誰堪命禹當今九服崩離三靈改卜
大運去矣諫賢路兆謀布德顧已莫能私僮命駕須

歸藩國予本代王及予而代天之所廢豈期如是庶憑
稽古之聖以誅四凶幸值惟新之恩預充三恪雪寃恥
於皇祖守禮祀爲孝孫朝聞夕殞及泉無恨今遵故事
遜於舊邸庶官羣辟改事唐朝宜依前典趣上尊號若
釋重負感泰兼懷假手真人俾除醜逆濟濟多士明知
朕意仍勅有司凡有表奏皆不得以聞是日上遜位於
大唐以爲鄒國公武德二年夏五月崩時年十五
史臣曰恭帝年在幼冲遭家多難一人失德四海土崩
羣盜蜂起豺狼塞路南巢遂往流彘不歸旣鍾百六之
期躬踐數終之運謳歌有屬笙鐘變響雖欲不遵堯舜

之迹其庸可得乎

隋書卷五終



